

१४६

दर्ता नं.:४८/२०७६/७७

पुर्खा दय्क तकगु सम्पत्ति, भीगु कला व संस्कृति
पिकाक-भक्तपुर नगरपालिका



पुर्खा दय्क तकगु सम्पत्ति, भीगु कला व संस्कृति

स्वयंया

नेपाल संवत् १९४५ कछलाश्व: / २०८१ मंसिर १५ / 2024 Nov. / ल्या: १२०, दाँ:७



ख्वप महोत्सव २०८१
तः जिक हानयँ

जनता म्वाःसा भाषा म्वाइ

ने.सं. १९८४ कौलाश्व द्वावना व च्यावना / अमोत्र २० व २१ मने / म्वाःसाक म्वाःसा म्वाःसा / म्वाःसाक

पीप्यकगु नेपालभाषा साहित्य तःमुंज्या व सांस्कृतिक ब्ज्याःया
शिरपा लःल्हाय्गु व सम्हेबजि ज्याभक्तः

शिरपा लः ल्हाय्गु व सम्हेबजि ज्याभक्तः



पीप्यकगु नेपालभाषा साहित्य

तःमुंज्याया शिरपा लः ल्हाय्गु ज्या इधः

ख्वप महोत्सव तःजिक हानय्ता कर्मचारी मुंज्या

(२०८१ मंसिर २ गते)



नेपालगञ्ज उपमहानगरपालिकाया जनप्रतिनिधिपुं ख्वपय

(२०८१ मंसिर ११ गते)



; DkfbSlo

@)*! dlt / !%, c^a\$!\$^, j if&

खप महोत्सव तः जिक हानय् फय्मः, भिन्तुनयँ

खप महोत्सव जुइगु दिन अः बःछिति जक मनि ।नगरपालिकां महोत्सव तःजिक हानय्ता मःगु फुक्क ज्यात बिचः याडःज्या न्ह्याकः च्वंगु दः । नगरबासीपिन्ता खाँ ब्याकय्ता त्वाल्य-त्वाल्य मुंज्या, स्वापु दःगु उद्योगत, व्यवसायिपुं मुंकः सल्हाबल्हा याडः बिचः कायो च्वंगु दः । श्वहे मंसिर २८ गते निसें पुस २ गते तक जुइगु खप महोत्सव लुमगु लुमन्ति वैगु काथं डाय्केता खप नगरपालिकाया जनप्रतिनिधिपुं, सचिवालय व नगरपालिकाया सकल कर्मचारीपुं नपां स्थानीय टीम, क्लब, सहकारी व मेमेगु संघ संस्थातय्ता नं ज्या ख्यलय्गु याडः महोत्सव तःजिक हानय्गु कुतः जुयो च्वंगु दः ।

उगु ज्या इवः या उलेज्या नेपाल मजदुर किसान पार्टीया हानय् बहम्हा नायो भाजु का. नारायण मान बिजुकुँ जु पाखं ऐतिहासिक नपां सांस्कृतिक नगर खपया दथिमथि लागू विश्व सम्पदा स्थल लायकुली तःजिगु समारोहसं याडः दीगु दः ज्या इवः तःजिक, घिसिलाक क्वचाय्केता खप नगरपालिकां जनताता इनाप याडः च्वंगु दः ।

हिंन्यगू सदिं निसें हिंडागू सदितक नेपालमण्डलया राजधानी काथं जुयो वांगु खप देशय् लिच्छवीकालीन व मल्लकालीन यक्व यक्व गथे खः अथेहे च्वंकः ल्यंकः म्वाकः तः गु मूर्त व अमूर्त सम्पदात स्वय दै । सम्पदाया महत्व मथुसेलिं अलय् पुरातत्त्व विभागं सचेत जुयो ज्या मसांसेलिं खपया अपलं ध्यवां काय् मरुगु बहुमूल्य सम्पदात न्हाडः ताडः वानय् धुंकलसा गुलिं न्हाडः वानिथें च्वडः च्वंगु दः । खप नगरपालिकां अजगु छगू छगू सम्पदात हिलः, मालः, मूलः स्वयो ल्यंकः म्वाकः भिंक तयो तःगु दः ।

खपया मथ, देगः, देवालय-शिवालय, पुखु, ल्वहँहिंति, फल्चा, नपां अपलं मूर्त सम्पदां खप देता स्वय लाइक याडः तःगु नपां लच्छिया नेकः स्वकः वथें वइगु नखा चखा, मेला, जात्रा अलय् प्याखं, दाफा, थजगु अमूर्त सम्पदां खप देता छगू म्वाडः च्वंगु संग्रहालय काथं म्वाकः तय्ता ग्वाहाली जुयो च्वंगु दः । खपया जुजु धौ, तकतपुली, ताइचिन बजी, हाकु परासी थानाया लोकं ह्वागु उत्पादनत खःसा सम्ह्य बजी, इवःभव्य, योमारी, चतामारी व थी थी नसात खपया च्वजःगु नसात खः ।

हस्तकला, औद्योगिक बज्या, कासा, बाजाया धिधिं बल्ला थजगु म्वाय्गु या थी थी हिंसीं जःगु पहः नं उगु इलय् पिब्वयता कुतः याडः च्वंगु दः । महोत्सवय् भाइपुं देशं दुनय् व देशं पिनयया सकलें पाहाँ पिसं धात्थेंगु खप दे गय्च्वं धाय्गु उब्ले खानी, स्वय दै ।

खपया कला, संस्कृति, थी थी सम्पदां थानाया संस्कारत भिंकः बांलाकः क्यनय्गु नगरपालिकां कुतः याडः च्वंगु दः । नगरयाहिंंगुंतुं वडाया लागा कयच्याय्गु व डालय्गु काथं स्वीनेगू थासय् औपचारिक स्टलत तय्गु क्वः छिय धुंकगु दः सा देशं दुनय् व देशं पिनय्या पर्यटकपिसं गनां छुं काथंया समस्यात फय थम्वाल्य मः धायो सुचुकुचु, शौचालय व्यवस्थापन, स्वास्थ्य, त्वनय्गु नाः थजगु मदयक मगागु वस्तुत मःछि व्यवस्था याय्गु काथं नगरपालिकां विचःयाडः तय् धुंकगु दः ।

महोत्सव तःजिक हानय्ता सकल खपया जनतां थःथःगु थासं फयां फक्व ग्वाहाली याय् । महोत्सव घिसिलाक, हिसिदय्क क्वचाय्कः थः थमं नं गर्व याय्गु थाय् दय्के । खप महोत्सव तःजिक हानय् फय्मः । भिन्तुना देछाय् ।

पिकाक-खप नगरपालिका/सम्पादक-आशाकुमार चिकंबञ्जार, डेस्कटप-धन लक्ष्मी त्यात, आवरण सज्जा-रेणु ध्वज, थाकू- भक्तपुर अफसेट प्रिन्टर्स फोन ल्याः ०१-६६१३०४३, इ-मेल- khwopapau@gmail.com



का.रोहितया चीन यात्रा तियान तोङ्ग बिहार (TIANTONG TEMPLE)

देश विदेशं वङ्गु चन्दां थुकिया खर्च याडः च्वनि ।

पिनयनं स्वयबलय् चिच्याहांगु खानय् दः सां अलय् दुनय् स्वः वाडा बलय् ता ता यक्व थाय् डालःच्वंगु अलय च्वजःगु चिनियाँ पहःया भवनत तस्कं स्वय हार्यपुगु, स्वसेलागू व भव्य खानय् दः । थाय् थासय् ल्हवनय् कानय् नं याडःच्वंगु दः ।

५८००० वर्गमिटर थाय् डाल ख्यडःच्वंगु थुगु बिहारय् सच्छिगू तःक्वगु व मेगु न्हयसक्व क्वथात व चुकत दः । भवनं जक ३८०० वर्गमिटर थाय् त्यलःच्वंगु दः । हिंच्याम्हा लोकं ह्वापुं भिक्षु पिनिगु ल्वहँतय् कियोतःगु मूर्तित, श्रद्धालु व उपासक पिसं कायो च्वंगु शील, धुं, मता बियो च्वगु खानिबलय् चीनय् धर्मखय् मनूतय्गु भावना हकनं जायो वगु दः धाय फः । सुन वंशया पालय् उगु विहारय् १५०० म्हा भिक्षुत अध्ययन व अध्यापन याड्गु । भान्छा (भुथु) (बैग) क्वथा व जा थुङ्गु भाँडात स्वयबलय् अजु चायपुसे च्वं । सन १९४९ तक आना डास, खुसम्हा भिक्षु त दः धायोदिल ।

थाय् थासय् पुखु, नागया बुद्धा कियो तःगु तः तः जःगु ल्वहँया पानसत, ल्वहँ हितितय्गु बांलागु व्यवस्था आना याडः तःगु दः । गुँया दश्वी च्वंगु व बाउँसे च्वंगु शान्तगु विहार तस्कं हे आनन्दगु थाय् खः । बिदा फ्वनय हाँ नेपःया जनता, बौद्ध धर्मात्मबीपुं व भिक्षुपिन्ता छुं (सन्देश) धायमःगु दःला दक न्यडा वलय् न्वकु भाजु स्यू स्यांग जुं धायोदिल- 'लुम्बिनी शाक्यमुनि बुगु जिमिसं सिया । न्हपायाय् थें हे नेपःव चीनया दश्वी भिक्षुत वय वानय्गु व ज्ञान काल बिल जुयो तुं च्वनय् दय्मः । अयाय्म्हा सरकारया खुल्ला नीति वा लुःखा चाय्कः ब्यूगुलिं देश विदेशं भिक्षुत वय वानय् फः । सरकारया थुगु नीति खाडः बौद्ध धर्मात्मबीवित तस्कं लयतायो च्वंगु दः । भ्नी नेम्हा जलाखाला पासा जुयो च्वंगु देया दश्वी मित्रता क्वातुयमः । नेपाल व चीनया बौद्ध भिक्षुपुं मिलय् जुयो विश्व शान्तिया निंतिं ज्या सानय् फय्मः । नेपः व नेपःमि पिनिगु विकास व भिं म्हुय ।'

भिक्षु स्यू सांगं मोटर दिक् तःगु थासय थय्क भ्नायो

ईलं मलागुलिं निङ्पोया पार्टी व मजदुर पासापुंनपां मथां मथां बिदा फ्वडः जिपुं १६०० दा पुलांगु 'शाक्य मूनि' या तियान तोङ्ग विहार स्वः वाडा । 'तियान तोङ्ग' या धात्थेंगु खाँ छु दक न्यडाबलय्- 'स्वर्गया म्हाय मचा' दक लिसः बिल ।

तःहांगु विहारया संरक्षक ख- स्यू स्योग । वय्क चिनियाँ भिक्षु संघया न्वकु खः । भिक्षु संघया नायो सांघाइ च्वनिगु । धुं, धूपायँ व मता थाय थासय् च्याकः तगु दः । आना जापानं निसें नं अपलं भिक्षु त वयो दीक्षा अथेधाय् शिक्षा (ज्ञान) कः वङ्गु खः । सन १९१४ सं तोया धायम्हा छम्हा भिक्षु थानानं दीक्षित जुयो वाडानिं वयकं जापानय् ल्याहाँ वाडः जोङ्ङ् धायगु छगू न्हूगु सम्पदाय (Sect) हे पलिस्था याडः दिल ।

६५ दाया भिक्षु स्यू स्योग जुं शाक्य मूनिया दे नेपःया पासाता थःगु बिहारय् लसकुस याय दःगुलि लसता प्वकसे न्हयसः या लिसः ब्यूसे - अःथाना ७० म्हा भिक्षुत बिज्याडः च्वंगु दः । दकलय म्हुँ उमरेया उपासक नीदा स्वयो क्वय यायम्हा खः । छिङ्ग वंशया स्वंगू पुस्ताया दस्तावेज थुगु विहारय् बांलाकः ल्यंकः मुडः तःगु दः । चच्याङ्ग प्रान्तय् नगर स्तरया प्यंगू व छगू प्रान्तीय स्तरया बुद्धधर्म सम्बन्धी या पौ चिनिया भाषं पिथानी । थाना नं तालिम बियो देया थी थी बौद्ध संघसंस्था व बिहार बिहारय् भिक्षु त छ्वय्गु याई । न्हूपुं भिक्षु पिनिगु शुल्क, बिहारय् स्वः वङ्गुपुं श्रद्धालु भक्त पिन्के काङ्गु शुल्क व दक्षिणा,

सच्छिखत पीखुगूगु खूप पौ, बःछि पौ(पाक्षिक)

बिदा बियो दिल अलय जिं वयकता नेपालय भ्नाइबलय लसकुस यायगु नपां लुम्बिनी व नेपाली बौद्ध बिहारत स्वःभायता नेपः भ्रमण भ्नाइगु कामना यासैं बिदा फ्वडा । थ्व विहार दक्षिणपूर्वी चीनया दकलय तः हांगु बिहार जुयो च्वना । निङ्गपोसं अशोक मन्दिर व मेमेगु बिहारत नं दः। अलय सायद जि हे निङ्गपो थ्यंम्हा न्हपांम्हा नेपाली जुइला ।

दक्षिणी चीनमा दकलय पुलांगु साफूकुथि थियान यी मण्डप


प्यस दा हाँ अथे घायगु मिङ्ग वंशया पालाय सन १५६५ सं उब्लेया छम्हा विद्वान नपां उप रक्षा मन्त्री थुकिता थःगु व्यक्तिगत साफू कुथि काथं दयकगु खः । अःउगु साफू कुथि सरकारया छगू संग्रहालय काथं तयो तःगु दः । १५ गू २० गू ति तःक्वगु व चिच्या क्वगु चुकः व भवनत क्यडः आनाया ल्याम्हो चाम्हा निर्देशकं धाधां वान- 'थुगु साफूकुथि ७०,००० गू पुलांगु ऐतिहासिक साफूत मुडः तःगु दः । बुद्ध धर्म व मेमेगु विषयया साफूत नं दः । स्वसदा हाँ खाड्सी वंशया पालाय चीनय ल्वँहत्य मूर्तित कियो ब्वयो तैगु अपलं चलन दःगु जुयो च्वना' वहे काथं किस्सी, सलाँ, धुँ, चखुबखुं, खिचा, न्हयकं स्वयो च्वंम्हा ल्यासे पिनिगु ख्वःज्याडः कियो तःगु ल्वँहत ब्वयो तःगु, नाःछँ, पुखु , डा, थी थी वस्तुत स्वयबलय साफूकुथि छगू पार्क थें खानय दः । थुगु साफू कुथिया घरपति (छँ थुवः) या नीन्हयदा तक परीक्षा ब्यगु कापीत नं मुडः तःगु दः। १९४९ लिपा थुकिता संग्रहालय दक नां छुडः न्हयाकला । प्यस दा हाँ चिनीयाँ आखःया छाप लिपि, नेसदा पुलांगु छाप, साफू किलं नै जक युनानं हःगु जडिबुटी तयो तःगु दः । पुलांगु साफूत नाखं-फसं स्येकी दक अलय चानीजक पुलांगु साफूत छापय याडः दराज दुनयँ ब्वयो तःगु दः। अलय पुलां पुलांगु साफूत च्वयया ताखय सुरक्षित याडः तयो तःगु दः । छक अध्यक्ष माओया छ्याञ्जे लि रूइ जुं आनाया साफूत स्वयो थः कय म्हुवँ जक ज्ञान दःगु मति तयो दिला धायगु खाँकाडः दिल । मिङ्ग वंशया प्यसदा पुलांगु अथेधाय सन १६१७ पाखयया

लोहँतय कियो तःगु चिनियाँ लिपि स्यनिगु वर्णमालात नपां मेमेगु ऐतिहासिक सामग्रीत ब्वयो तःगु दः । उगु छँया अंशियार नेम्हा दाजु किजाया अंशवण्डा जुबलय साफूत वण्डामयासिं मूतयगु क्वः छिता । छम्हा अंशियारं साफूया पलि छगू नेगू लाख दां काला मेम्हासिता साफू । अलय छुँ ई लिपा धेबाकः म्हासिं धेबा खर्च याडःनय धुंकल अलय साफू धःसा ल्यं दःगु खाँ आनाया निर्देशकं काडः दिल । १९२३ तक उगु छिङ्ग वंशया मनूत आना च्वंगु खः, अःगना वाना गना च्वना मसिया । उगु साफू कुथिसं मेमेगु छँ व जग्गा त नं ताडः थी थी थाय्या ऐतिहासिक व सांस्कृतिक महत्व कःघाडःच्वंगु मेमेगु कलात्मक वस्तुत आना ब्वय यंकगु दः । उगु थाय संरक्षित थाय दयकेता पुलांगु कलात्मक छँ त ल्यंकः भिक तयो व मुलःउत्खनन याडः लुयो वगु थी थी ज्वलँत नं आना ह्यगु ज्या न्हयाकल ।

निङ्गपो सहर व उगु लागाय विशेष आर्थिक लागा काथं क्वः छिगु लिं न्हँ न्हँगु लाँ, भवन व योजनात दयक बलय लुयो वगु फुक्क पुरातात्विक महत्वं जःगु वस्तुत आना मुनय हयो संरक्षण यायगु ज्या यात अलय सरकारं उगु साफूकुथिता च्वजायकः अज तः हांक यंकयता धेबा ताडः ब्यगु नं ल्याम्होम्हा निर्देशकं धायोदिल ।

नेक्व प्यक्व चुकःत ल्हवनय-कानय याडः च्वंगु दः। १९२३ पाखय छिङ्ग जुजुपिनिगु वंश पाखं छम्हा तःमिम्हा मनूसिं न्यागु छँ याता अः संग्रहालय तयो तःगु जुला । वार्दाली, चुकः दबुत स्वय बलय नेपःया पुलांगु छँत लुमांसे वल । तस्कं कलात्मकतां जःगु छँत, सामान, पालकी त छगू छगूया थःगु हे बाखं दः धायोदिल । धात्थें धायगु खःसा छन्हू न्हिचछी बिक स्वयमःगु थाय जुयो च्वना ।

आनानं जिपुं निङ्गपो नगरया जनसरकारया विदेश मामलाया निर्देशक हे चि चेङ्ग (HE ZHE CHENG) जुं ग्वसःग्वगु बहनीया भ्वयखय वाडा । पाहाँ सत्कारया नितिं सुभाय देछायो नेगू देशया जनताया मित्रता व थःवं थःया भिंज्याया व्यापारय बः यायता, चिनियाँ जनताया भिं जूयो, तःमि जुयमः धायो टोष्ट प्रस्ताव तया ।



प्रधानमन्त्रीया चीन भ्रमण व दे भिंकय्गु न्ह्यसः

विवेक

प्रधानमन्त्री खड्ग प्रसाद ओली श्वहे मंसिर १७ गते निसं २१ गते तक डान्ह्या चीन भ्रमणय् भ्नाइगु जुयो च्वंगु दः । चीनया राष्ट्रपति सि चिनफिडया ब्वनार्यँ चीन भ्रमणय् भ्नाय् तांगु खाँ धायो च्वंगु दः । भारत भ्रमण याय्गु मतिं प्यला तक पिडानं मडवंसेलिं चीन भ्रमण याय तांगु खाँ थी थी न्हिपौ, पौ पाखं बुखाँ पिकायो च्वंगु दः ।

छगू सार्वभौम व स्वतन्त्र देशया नेता वा प्रधानमन्त्री न्हःपां गुगु देशया भ्रमण यागु धाय्गु खाँ छँ मेगु देशं क्वः छिडगु श्व गजगु संस्कार जुई ? चीन व भारत नेगू नेपःपा जलाखाला दे खः । नेपः या स्वापु नेगू दे नपां उथिं ग्यंकः दयमःगु खः । न्ह्यागु देशया नेतां दकलय् न्हःपां थःगु देशया जनताया भिं जुडगु स्वयमःगु खः । अलय् नेपःया नेतात छाय् मेपिनिगु भिं जुडगुलि जक चिन्ता कायो जुला ? भारतीय शासकपिसं अमिगु देशया भिं स्वडगु स्वाभाविक खःसां नं नेपःया सार्वभौमिकताता क्वत्यलः च्वंगुलिं नेपःमिपिसं अः तक नं विरोध याडः वयो च्वंगु दः ।

देया नेतात व प्रधानमन्त्री पुं विदेश भ्रमण, छोथाय् पुजाआजा वा थी थी ज्याइवः खय् वानिबलय नं उकिया राजनीतिक अर्थ पिज्वई । भारतीय शासकपुं अमिकय् न्यडजक नेपःया प्रधानमन्त्रीपुं विदेश भ्रमण वानय् मःगु काथं ज्या याडः च्वना । नेपालय प्रधानमन्त्री जुलकिं दकलय् न्हःपां भारतय् भ्रमण याय्मः अथे धाय्गु भारतया आशीर्वाद काय्ता दकलय् न्हःपां दिल्ली वानय्मःगु अमिगु

इच्छा खः । अः तकया फुक्क धाय्थें हे प्रधानमन्त्रीपिसं अमिगु इच्छा पूर्वाक च्वंगु खानय दः ।

माओवादी प्रधानमन्त्री प्रचण्ड न्हपां प्रधानमन्त्री जुबलय् वं दकलय् न्हःपां विदेश भ्रमण चीनं याय्गु मति तला । व ल्याहाँ वैगु इलय्तकखय् भारतया चको दबाब(अपलं क्वता) ब्यूसेलिं विमानस्थलय पत्रकारपुं नपां “जिगु औपचारिक भ्रमण भारतं हे जुई” दक मधसें मगाक बिला । थुकीं नेपः दे स्वतन्त्र व सार्वभौम देश धःसां नं थानाया शासकपुं भारतया लाहापातिंचाय्गु इशारां प्याखं ल्हुईपुं कतामारी जक धाय् फः ।

ख्यां अःयाय्महा प्रधानमन्त्री के. पी. ओलीं नं भारतं ब्वनिगु तहांगु आशा यागु खानय दः । वं सरकार निः स्वानय धुनय वं हे परराष्ट्रमन्त्री आरजू देउवाता भारत भ्रमणय् छ्वता । वाता भड्य लसकुसयागु खाँ आरजुं हे पिब्वता । ओलीया निमन्त्रणा ज्वडः वांमहा आरजूता न आनाया प्रधानमन्त्रीं नेपाल वयगु खाँ ल्हाता न ओलीता भारत भ्रमणय् वा दक छुं ब्वनापौ हे हला ।

संयुक्त राष्ट्र संघया महासभाय् ब्वति कः वानय्ता सेप्टेम्बरय् सं.रा अमेरिकाय् वानय्गु इवलय् जक भारतीय प्रधानमन्त्री मोदी नपां सं.रा अमेरिकाय् हे नपालाता । आना नपा लाय्ता नं अपलं कुतः याय्मःगु खाँ स्वापु दःपुं पदाधिकारी पिसं धःगु दः । न्ह्याथय् थःजु अःचीन भ्रमणया ज्याइवः पिकःगु दः ।

केपी ओलीया चीन भ्रमणया खाँ प्याहाँ वसां निसं तप्यंक व बेवक्यक चीन

विरोधी खाँत प्याहाँ वयो च्वंगु दः । श्व सिडकं सिडकं ग्वसः ग्वयो हे पिकायो च्वंगु सियदः । नेपाली कांग्रेसया नेतात प्रधानमन्त्रीया चीन भ्रमणया इवलय वी आर आइ दुनय्या ऋण काय मज्यगु, अनुदानजक कायमःगु खाँ धायो च्वंगु दःसा छम्हा नेम्हा वेक्वपुं च्वमिपिसं ‘पोखरा विमानस्थल मोडल थें जुडगु छुं नं पहः या ग्वाहाली भीता म्वः धाय् फँगु हिम्मत निर्णयकर्ता तयके दयमः’ धायो नेतातय्ता पवाडः : च्वंगु दः । मंसिरया न्हिपौ राजधानीखय् सरोज मिश्रं च्वता- ‘चीनं थःगु हे पहलं दयकगु डीपी आरय् नेपः राष्ट्र मिखा तिसिड सहमती खय् लाहाचिंयां तय् फँ मखु ज्वी ।

आहा गुलि बांलागु खाँ, नेपःया सार्वभौमिकता क्वत्यलिगु काथंया नेपःया शासक दल तयसं राष्ट्रघाटी एमसीसी सम्भौता यागु इलय् वयक च्वमिपुं गना छँ गलय् द्रहँ वाडः च्वना ? एमसीसीया खायँ दे ब्याक विरोध जुला । स्वतन्त्र व सार्वभौम देशं थःगु योजना ल्यय्तानं अमेरिका व भारतया ग्वाहाली काय्मःगु प्रावधानया विरोध याडः नेपः या कानून स्वयो एमसीसी सम्भौता बल्लाइगु धायो जनतां उब्ले विरोधया सः त.गु हे खः । गुब्ले सर्वोच्च अदालतय् मुद्दा जुला अलय एमसीए नेपालं ‘नेपःया कानून मानय् याय्ता संस्था वाध्य जुडमखु’ दक च्वयो लिसः ब्यूसेलिं तिनि फुक्क खाँ सियदता । देया सार्वभौमिकता हे मल्यनिगु काथं जुयफःगु बुँदा नपांया सम्भौता जाबो ५५ अर्ब अनुदानया लागिं शासक दलतय्सं लाहाचिंतला । थःता बुद्धिजीवीजक धाइपुं

सच्छिद्वत पीखुगुगु ख्वप पौ. बःखि पौ(पाक्षिक)

ध्वं तयसं व सम्भौता देया भिं जुइगु जक धाला, ककु सुक हाला अलय् देशघातीतयदखय् पालिता ।

प्रधानमन्त्री ओलीकय् कार्तिक २९ गते कान्तिपुर मिडियां ग्वसः ग्वगु छगु ज्या इवः सं चीन भ्रमणया खायँ न्यंगूलि स्पष्ट यासे धायोदिला-सार्वभौम देया प्रधानमन्त्री गखय् छिना अखय् भ्रमण वानय फः, स्वतन्त्रता दः । भी नेम्हां तः तः हांगु जलाखाला देः नेगु नपां बांलागु स्वापु तयमः ।' (कान्तिपुर ३०, कार्तिक)

चीन व भारत नेगु जलाखाला दे जुसां नेगु देया नेपः प्रतिया धापु बिस्कं बिस्कं पहलं स्वयो च्वंगु दः । भारतं वयाके मन्यंसं नेपःया सविधान पिब्वता धायगु निहँ, ज्वडः २०७२ सालय् नेपालय् नाकाबन्दी याता । नेपःमिपुं तः भ्वखाचां छटपटी जुयो च्वंगु इलय् मिपुगुलि क्वाकं वाडः नाका बन्दी याडः दुःख बिला वहे इलय् चीनं लाखौं लिटर पेट्रोलियम पदार्थ अनुदान बियो बांलाम्हा पासाया ब्यवहार क्यना । अथेहे कोरोना महामारीया इलय् नेपःया सरकारं खोप ह्यता भारतता करोडौं धेबा बियानं छ्वयो महः, चीनं तुरन्त ४० लाख खोप त छ्वयो ह्यो नेपःमि पिन्ता उद्धार याता । थजगु अपलं दसुत दः ।

सड्कटया इलय सु बांलाम्हा पासा धायगु सिय दै धःथें धात्थेंगु खौं नेपाली जनता सड्कटय् लाडः च्वंगु इलय् पलापतिकं चीनं ग्वाहाली याडः च्वंगु दःसा भारतं वहे मौका स्वयो नेपः या जलस्रोत व प्राकृतिक स्रोत साधन लाकः कायो च्वंगु दः ।

छुं ई न्ह्यौं जाजरकोटय् तः भ्वखा ब्वला । जनतात बेहाल जुल । वहे इलय चीन सरकारं राहत ग्वाहाली छ्वयो हला अथेनं सरकारं चीनता राहत सामग्री छ्वयो ह्यगु अनुमति तक मब्बू । लिपा तातोपानी

नाकां छ्वयो ह्यगु अनुमति बिला धायगु बुखौं प्याहौं वल । काठमाण्डौं विमानस्थलय् भारतीय विमान दिकय महःतलय् चीनया विमानता दिकय तक मब्बूगुलिं पोखरा विमानस्थलय् यंक दिकय यंकय मःगु खौं उब्ले अपलं बयबय जुगु खः ।

अः विभुवन विमानस्थल न्हिं हिधौ बन्द याडः तःगु दः । अःब्वयकःच्वंगु फयखः मध्ये ३० प्रतिशत विमानसेवा म्हवचा यागु दः । अथेनं पोखरा विमानस्थलय् अफ्र नं न्हयाकय् फःगु मरुनि । थुकिया मू हनि उकि चीनया लाय् दः गुलिं हे खः । चीन कय् २५ अर्ब ऋण कायो दय्कगु उगु विमानस्थल दांदां हौं उलेज्या जुय धुंकगु खः सां भारतं आकाशमार्ग छ्यय्के मखु धायो स्वीकृति मब्बूगुलिं चाय्के फःगु मरुनि । अफ्र नेपाली कांग्रेसया सांसदपिसं धायो च्वंगु दः कि 'प्रधानमन्त्री भ्रमणया इवलय् पोखरा विमानस्थलया ऋण अनुदान काथं हिड्केगु माग याय् मः ।'

कांग्रेसी सांसदपुं, देशता खबौंया ऋणय् लुकुफिडः नेपःया अर्थतन्त्र थमनं म्हछिडः छ्वैपुं विश्व बैंक, एशियाली विकास बैंक, व अन्तर्राष्ट्रिय मुद्रा कोषनपां ऋणया खायँ थजगु खौं छाय् ल्हाय मफूता ? साम्राज्यवादीतयगु उगु आर्थिक ज्याइवलं याड हे, नेपालं आर्थिक विकास याय मफूगु खौं न्हिनय्या लिभःथें चकाकं सिय मरुला ?

पोखरा विमानस्थलया लागि मुक्कं २५ अर्ब ऋण मुक्कं २ प्रतिशत अलय् नीदाया दुनय पुलय्गु याडः कःगु खः । २५ प्रतिशत अनुदानय् हिड्किगु जुसेलिं उकिया मुक्कं १.५ प्रतिशत जक दायँ दँ सं ब्याज दक पुलय मालिगु जुइतिनि । अलय् व विमानस्थलता घायँ बुइक ख्यः याडः तय्गु बेक्वमति तयो अःतक नं छ्यलय्गु मति मतःगु खानय दः । बरु नेपःमि पिन्ता चीन विरोधी खौं

बयबय याड वयो च्वंगु दः । अमेरिकी साम्राज्यवादया डलर व भारतीय विस्तारवादया आइ सी तलब नैपिसं न्हयागु हे मखुगु खौं ल्हाडः बयबय याःसां अः यायपुं जनतात उलि मथूपुं धःसा मखु । छुंदाँ हौं चीनकय् फयख न्याता व नपां स्वंगः विमानता अनुदानय् नं बिल । अलय व फयखः त गुब्लें स्यना धायो गुब्लें बांलाक चलयाय् सःपुं पाइलट मता धायो चलय मया । बरु फुक्क विमान लिलामय् छ्वता । थुकिं नेपालय् चीन विरोधी ज्या इवः गुलि जुयो च्वंगु दः धाय्गु सिय दः ।

प्र.मं.या चीन भ्रमणया इलय वी आर आइ कार्यान्वयनया सम्भौता लाहाचिं तयो वःसा व लसताया खौं जुल । २०७४ साल वैशाख ३० गते नेपाल व चीनया दशवी वी आर आइया खायँ सम्भौता जुगु खः । नेपः पाखं शङ्कर दास बैरागी व चीनया राजदूत यू होड जुं सम्भौतासं लाहाचिं तःगु खः । सम्भौता याय्गु अलय् मछ्यलयगु धाय्गु खौं जुय फैमखु । धात्थें धाय्गु खःसा भारतं नाकाबन्दी यागुलिं हे वी आर आई खय् सहमती याय्ता अःपुगु खः । वहे इलय नेपःव चीनया दशवी ३३ प्रतिशत पेट्रोलियम पदार्थ नेपालय् छ्वयो ह्यता सहमती व चीन नपां महत्वपूर्ण पारवहन व यातायात सम्भौता नं जुल । भारत मखुसा चीन दः धाय्गु सन्देश नं उकीं बिल । धात्थें धाय्गु खः सा, नाकाबन्दीं भारतता हे बाँमलात । कालापानी, लिपुलेक व लिम्पियाधुरा नपां दुथ्यागु च्वामुगु नक्सा नं उगु इलय हे संसदं थ्यं मथ्यं सर्वसम्मति पारित याता । अथेख्यानं अःतक नं व थाय् धःसा भारतया लाहातय् हे लाडः च्वंगु दः ।

प्रधानमन्त्रीया अः जुइगु चीन भ्रमण नेपाल व नेपःमि पिनिगु भिं जुइगुलि जुयमः ।

न्ह्यतँवः घानाया क्रिया

नेपालभासय् थःगु हे पहलं क्रिया ब्वलनाच्वन । क्रियाया ब्वनेखं तःचकलाय् ब्यानाच्वन । न्हापां ब्वनेगु मूखं दुधं क्रिया खः । दुधं क्रियाया ल्याःचाः नापं श्वया थीथी पहःयात कयाः तःपु च्वसु च्वयेधुन । दुधं क्रियाय् न्ह्यतना तंगवः च्वना क्रिया नं ब्वनेमाःगु दु । थथे दुधं क्रियाय् न्ह्यतँवः घानाया क्रिया ब्वनेबेल्य् भीगु भाय् तःधुकू जूगु ब्वनेदइ । नेपालभाषा क्रिया धुकुतिं तःमिगु भाषा खः । थथे याउँक त्याजिक धायेदइ । थन न्ह्यतँवः घाना क्रिया ब्वनेत तःकथं ब्वःथलाः ब्वनेमाःगु दु । थुकिया पिदना खँवः, खँपु, हात्वाः, धात्वाः फछिं फत्तले सिनाः मुनाः थुकिइ स्वथनागु दु । आः थुकियात कथहं ब्वने ।

१. सामान्यकथं ब्वनेबेल्य् न्हापां दुधं क्रियाया स्पष्ट अर्थ दइ । अले न्ह्यतँवलय् नं स्पष्ट अर्थ दइ । श्व न्ह्यतंगवलं दुधं क्रियाया थीथी अर्थप्रकार कनिइ । गथे न्ह्यतंगवः दु, पि, थ, क्व, न्ह्य, लि न्ह्यतनावःगु क्रियाया दसु ब्वयाच्वना । गथे-

दु च्वनाः - दुकाये, दुस्वये, दुज्याये, दुछ्याये, दुछ्वये ।
पि च्वनाः - पिकाये, पिस्वये, पिज्याये, पिछ्याये, पिछ्वये ।
थ च्वनाः - थकाये, थस्वये, थज्याये, थछ्याये, थछ्वये ।
क्व च्वनाः क्वकाये, क्वस्वये, क्वज्याये, क्वछ्याये, क्वछ्वये ।
न्ह्य च्वनाः - न्ह्यकाये, न्ह्यस्वये, न्ह्यज्याये, न्ह्यछ्याये, न्ह्यछ्वये ।
लि च्वनाः - लिकाये, लिस्वये, लिज्याये, लिछ्याये, लिछ्वये ।
थुकथंया न्ह्यतँवः फुककं क्रियाय् च्वने थाकुगु नं दु । गथे - दुल्हाये - वा दुल्हाये । पिदने - प्याखं पिदने । थकने मिखा थकने । अथे हे थधिने, क्वछुये, न्ह्यपने, लिछ्वये आदि ।

१.१. दुया अर्थ भेद ज्वनाः स्व छगः नं न्ह्यतँवः जूगु ब्वनेखं दु । श्व स्वया रूपभेद स्व, स्वः, स्वय् नं दु । गथे स्व च्वनाः स्वदुने । नालय् तुति स्वदुने, स्वच्चाये, स्वपिये, स्वपिये, स्वत्ताये, पिस्वहाये ।

२. दुधं क्रियाया अर्थ स्पष्ट दुसां अर्थप्रकार कनिइगु न्ह्यतँवःया अर्थ स्पष्ट मदुगु दु । गथे - क्यने श्व दुधं क्रियाया अर्थ स्पष्ट दुथाय् - जालय् न्या क्यने, छुँच्वलय् छुँ क्यने, कँथय् गाच्वः क्यने । न्ह्यतँवःया अर्थ स्पष्ट मदुथाय् । गथे - तक्यने । व्यापारय् न्यासः दां क्यने । क्यनेयात थुकथं ब्वनेथाय् अर्थप्रकार तँवः त च्वनिइबेल्य् कँथय् वसः तक्यने श्व स्पष्ट छ्यला दु । थुकिइ तँवः तया अर्थ स्पष्ट मदु । थुकथं न्ह्यतँवःया अर्थ स्पष्ट मदुथाय् - लाये दुधं क्रियाया छालाये । अथे हे कने - चकने छिये - क्वः छिये, दये - क्वःदये, (ह्यंगवाः) ब्वदये । थुकिया च, क्वः, ब्व आदि तँवलय् नाकं अर्थ स्पष्ट मदुनि ।

३. तँवःया अर्थ स्पष्ट दु । अयनं दुधं क्रिया जकया अर्थ स्पष्ट मदुथाय् दु । थुकथं न्ह्यतँवः स्वाना क्रिया थन न्ह्यब्वये । गथे - क्वह्यने थन क्वया अर्थ स्पष्ट दु । तर दुधं क्रिया ह्यने जकया थन अर्थ स्पष्ट मदु । अले क्वह्यनेया बालाक अर्थ दु ।

४. न्ह्यतँवः अले दुधं क्रिया नितांया अर्थ स्पष्ट मदुथाय् नं दु । तर थुपिं निगलं स्वानाया अर्थ बालाक स्पष्ट अर्थ दु । गथे - पित्याये श्वया अर्थ नय् पित्याये, प्वाथय् पित्याये थथे सार्थक छ्यला दु । तर पि अले त्याये नितांया अर्थ मदु । त्यायेया बिस्कं अर्थय् दां त्याये, जुलं त्याये, चुंला त्याये दुसां पित्यायेया ल्वयक त्यायेया अर्थ मदु । थुकथं न्ह्यतँवः स्वानाया क्रिया सत्तिये, चब्वुये, लहिये, पम्हुयेयात ब्वने । गुकिइ तँवः व दुधं क्रियाया ब्यागः ब्यागलं अर्थ मदु । मिखा तिसिसये, वसः तिसिये छ्यलाय् तिसिनाया नं अर्थ स्पष्ट मजू । अथे पास्याना नं दु ।

५. दुधं क्रियाया बिस्कं अर्थ दु । तर थुकिइ न्ह्यतँवः च्वनाः थुकिं भिन्न भिन्न अर्थ कनावंथाय् दु । गथे - स्वाये । श्वया अर्थ कापु स्वाये, खिपः स्वाये, खं स्वाये थथे ब्वने । तर थुकिइ न्ह्यतंगवलं बिस्कं अर्थ पिथनाच्वंगु ब्वने । बस्वाये (बस्वायेया भाषिका भेदकथं ब्वास्वाये दु) - बँय् बस्वाये । तस्वाये - कथि तस्वाक थने । म्हं मफया म्ह तस्वाये हे थाकुयाच्वन । तिस्वाये - श्व अर्थप्रकारकथं तिस्वायेलिसं ऊलाक ब्वनेदु । श्व थें प्यने - खिपः प्यने, माकः चां जाः प्यने, (संस्कृतिकथं) इला प्यने किसली प्यने । प्यने थथे हे ब्वने । तर बिस्कं अर्थय् तप्यने, जंधू धुप्यने थथे नं ब्वनेदु । तस्वाये, तप्यने नितां दुगु धात्वाः लँ तप्यं ध्वाखा तस्वाः थथे दु ।

५.१ छ्येया तःथिकय् छ्यला दु । गथे - स्वां छुये, नां छुये, चिं छुये आदि । अथे हे न्ह्यतँवः नं तःथिकय् श्वया छ्यला दु । गथे - थछुये, क्वछुये । देछुयेया छ्यलाय् भुथुलिइ देछुये । थथे हे स्याये । कपाः स्याये, प्वाः स्याये, मिखा स्याये । अथे हे नुगः स्याये, नुगलय् स्याये । अले सकर्मकय् दुगु, म्ये, खसि, खा, हँय् स्याये । अले तंस्याये थथे दु । श्वयात न्ह्यतँवलय् अर्थान्तय् ब्वलंकातःगु दु । गथे - हिस्स्याये, ल्हाः ब्वब्वस्याये, पास्यारे । छ्यलाय् नकारात्मक अर्थय् पास्यारे मत्यःम्ह ।

६. छगः न्ह्यतँवःया थीथी दुधं क्रियाय् थीथी अर्थ पिदंथाय् ब्वनेदु । गथे - छाये-लछाये । श्याये - लश्याये । व्यने-लव्यने (वाकाःलव्यने) । फ्यने लफ्यने (वाकाः लफ्यने) । हिये - लहिये । हने - लहने आदि ।

सच्छिव पीखुगु स्वप पौ. ब.छि पौ(पाक्षिक)

७. ताजिग्वल्य् तः, ची थथे हे म्येम्येगु न्ह्यतना वयेवं श्व नं क्रियारूप्य् पिदं । तर थुकियागु क्रियार्थक, स्थितिबोधक अले परभूत पूर्वकालिक रूप्य् अले प्रेरणार्थक्य् जक ब्वनेदइ । थुकिइ ताजिग्वः मूग्वल्य् ल लिउ वःथाय् श्व लया प्रभावं परभूतय् ल हे वइ । अले पूर्वकालिक याः व प्रेरणार्थक्य् युके वइ । म्येगुलिइ परभूतय् त, पूर्वकालिक्य् नाः व प्रेरणार्थक्य् के जक वइ ।

थन ताजिग्वः मूलस 'ल' लिउ वःथाय् -

गोल (संस्कृत) > ग्वल > त्यः

फुल्ल (संस्कृत) > फोल > फवल > फवः

जाल (संस्कृत) > जाः

श्व थीथी क्रियाय् ल, याः, युके वइ । गथे -

तःग्वः (ख्येय्, सन्तुला, प्वस्तिक) तःग्वये (क्रिया), तःग्वल (परभूत), तःग्वयाः (पूर्वकालिक), तःग्वय्के (प्रेरणार्थक) ।

परभूत ल पूर्वकालिक रूप्य् याः, प्रेरणार्थक रूप्ये युके वइथाय् जालया तःजा, तजाये भूवलं

तःजाल तःग्वयाः तःजाय्के

गोल (सं.)>ग्वल>ग्वःया तःग्वये इवलं

तःग्वल तःग्वया तःग्वय्के

फुल्ल (सं.) > फवल > फवया तःफवये इवलं

तःफवल तःफवया तःफवय्के

दुरुप्वः - प्वल >वया तःप्वये इवल

तःप्वल तःप्वया तःप्वय्के

परभूत त पूर्वकालिक रूप्य् ना. प्रेरणार्थक रूप्य् के वइथाय्

पा, पा - तः पाना तःपाके

थु- तःथु तःथुयाइवलं

क्तथुत तःथुना तःथुके

धि - तःधि, तःधियेया इवलं

तः धित तः धिनाः तः धिके,

हा - तहा, तःहायेया इवलं

तःहात तःहानाः तः हाके

पु- तःपुपुयेया इवलं

तःपुतः पुःपुना तःपुके

थुकिया क्रियाविशेषणाय् युकेया युक् जुइ । गथे - तजाय्क, तग्वय्क, तःपुय्क, तःप्वय्क ।

केया क जुयाः तःपाक, तःथुक, तःधिक, तःहाक, तःपुक आदि ।

८. गुगुं खंग्वःया स्पष्ट अर्थ दु । वया रूपावली थयंक नं दयेफु ।

थुकिया न्ह्यतंग्वः रूप ब्वनेमाय्क दु । धाये, श्व उप्वः क्रिया नाप स्वाः कथं ब्वनेमदु । गथे - न (गन्ध)या नतुने, नताये, नस्वाये । खं (वार्ता)या खं ल्हाये । ह्वः (पवाः)या ह्वगने, ह्वखने, पवाः (ह्वः) या पवाः गने, पवाः खने ।

९. संस्कृतं वःगु खंग्वः न्ह्यतंग्वः रूप ब्वलंथाय् बल - बः लाये । गोल - ग्वः, ग्वः लाये ।

१०. न्ह्यतंग्वः निगः जक लिसा कयावःथाय् -

हिहि - मचा हिहिलना ख्वये ।

ब्वब्व - ल्हाः ब्वब्वस्याये ।

छ्येछ्ये - छ्येछ्ये पने (छ्येछ्ये पना हाले) । श्व तंग्वः याकःग्वः कथं हिलने, ब्वस्याये, छ्येपने धया मच्चं ।

११. याकःग्वलं अले लिसा कयाः नं धयावःथाय् छं ब्वने ।

तक्यने- ततक्यने । लद्याये - ललद्याये । मिखा भ्वेकने - भ्वेभ्वेकने । छ्यंगू स्येकुने - स्येस्येकुने । भवं प्वाःगने प्वाः प्वाः गने । लं ह्वःगने - ह्वःह्वः गने ।

११क. श्व हानं म दुतना नं छ्यलावः । गथे -

ततमत क्यने । त्वःकने, त्वःत्वःकने, त्वःत्वः मत्वः कने । स्येकुने, स्येस्येकुने, स्येस्येमस्येकुने । ज्वपिये, ज्वय्ज्वपिये, ज्वय्ज्वय्मज्वय् पिया स्वये । ललमल धाये । ललमल निथिकय् ब्वनेदु । छगू लथ्याये, ललथ्याये, ललमलथ्याये । म्येगु ख्वबि ललमल धाये । श्वया ल, लल, जुया ब्वलना मच्चं ।

११ग. थन धायेयाके नं थथे न्ह्यतना वइगु छ्यला दु । गथे - जा धेधे धाये । च्वय्च्वय् धाये । मन चं चं धाये । म्ह चेंचें धाये । तमं धेंधें धाये । म्हय्म्हय् (म्हासु म्हासु) धाये । खख (खायु खायु) धाये । हिलिमिलि धाये । (ख्वये) ख्वख्वमख्व धाये । ख्वबि ललमल धाये । मिखा ग्वः ग्वः धाये । लःलः धाये । जा छछः धाये ।

१२. न्ह्यतंग्वः थी थी च्वनाया छं क्रिया

गने - ह्वःगने, प्वाःगने, सुखूगने ।

ताये - स्वत्ताये, कत्ताये, लय्ताये ।

चाये - पुचाये । लासा फूचाये । यच्चाये । (च्वसु) क्वचाये । थच्चाये (थचाः वये) । हीचाये, हिहिचाये । हीमी चाये । तंचाये, तंतंचाये । कुचाये । छगू धात्वाः दत्तले कुचा मध्येवं बिचाः, प्यन्ह्या ल्वःचाः आः धयां छुचा । क्वचाये च्वनाया धात्वाः-नया मचाः भना क्वचाः । लाये लिलाये । ज्या चूलाये । ल्वय् क्वलाये । बल्लाये । गल्लाये-गल्लाक खापा तिये । बालाये । ज्या ताःलाये । चाकःलाये । ल्हाये - खं ल्हाये । गःचा चा ल्हाये । तु त्वाःल्हाये । गाःल्हाये । स्वप्य ल्हाये । क्रियायोगी - क्रियाविशेषण जक

जुयाः छ्यला वःथाय् । अथे हे ह्वस्ताक-ह्वस्ताक लुयायने ।

भज्यंक - भज्यंक स्यने । नर्थाक नर्थाक हकल । न्वखंक न्वखंक हल । खिचां ह्वच्याक न्यात, उत । पिच्याक न्हाय्पं पिच्याक हाल । च्याये सामान्य अर्थय् मिच्याये, मत च्याये हे खः ।

न्ह्यतंग्वलं बिस्कं अर्थ कनि । गथे न्हाय्पं पिच्याक हाल । खिचां ह्वच्याक न्यात ।

सच्छिव पीसुगु स्वप पौ. ब.छि पौ(पाक्षिक)

तुलेया खिचा चातुले । ग्वःतुले । (फक्या पिबः, ख्वला) लु
लूतुले । सिला मूतले । म्ये खाखातू थें चाः तुले ।
१३. न्ह्यतँग्वः कथं भी क्रियायात आः छसिकथं तये ।
क - कत्ताये । कःघाये ।
कय् - कय्पुये । कय्च्याये । कसिये (कसिक्क घय्पुये) ।
ग - गल्लाये ।
घ - घच्चाये । घय्पुये । घुतिने । घेंघेंघाये ।
च - चकने । चफुये । चबुये । चहिले । गःचा चाल्हाये । चेंचें
घाये छ - जा छछः घाये । छ्येछ्ये पने (-पना हाले) ।
ज - जँ ज्यने । ज्वःज्वःखाये । छ्यलाय् मानय्या लिसें ज्वः
ज्वः खात ।
ज्वपिये - मिखां ज्वय् पिना स्वल ।
झ - झ्वय् पिये । छ्यलाय् नतुचां भवय् पिये ।
त - तछ्याये । तज्याये । तप्यने । तस्वाये तापाये । तिप्यने ।
मिखा तिप्यने । वसः तिसिये । मिखा तिसिये । तिल्ल प्यने ।
तिंगा न्ह्ये । तिंगा न्ह्येया हात्वाःकथं - आखः ज्वःलाक धाड्गु
श्वया छ्यला लिउने नं दु । गथे - चला न्हूल तिंगा तिंगा
जंगलपारि गंगा । तिन्ह्ये । तिस्वाये न्हाय्पं तिस्वाये । तिंहितिहिं
न्ह्ये । मिखा तेलाये ।
थ - थुये - छ्यलाय् ध्वाथुये ।
ध - धचिने । धेधेघाये । ध्वतुये । ध्वदुये । ध्वपिये । ध्वेपिये ।
न - नताये । नतुने । नीस्वने ।
१४. न्ह्यतँग्वलं दुधं क्रियाया अर्थ अझ स्पष्ट जुइ -
क्वः - क्वःछिये । क्वःदये ।
गने - प्वाःगने । लिगने । सुखू गने । ह्वः गने ।
च्वने - कुकुच्वने । पुच्वने (पवित्र जुयाः च्वने) ।
ताये - नताये । ह्येताये । कत्ताये । क्वत्ताये - ज्या क्वत्ताना
याये
ति - तिप्याये । तिसिये ।
दये - क्वः दये । त्यादये । ढ्वदये ।
दले - कुचा दले । कू दले । क्वदले । त्वाःदले ।
दाये - क्वदाये । धलिमय् च्वय् क्वलापू लायाः वया छःने अःपा,
चा,फक्वन् बँयात माथंक दायेयात क्वदाये धाड ।
नये - बिबि नये ।
पा - पाचिने । सत्य पाः फये ।
पाये तापाये । थसः पाये ।
पि - पिकाये । पिज्वये ।
पु - पुचाये । पेपुने । प्वय् चाये । प्वःचिने । प्वः चिये ।
प्वये - माहां प्वये ।
बुये - माहां बुये । थन बुयेया छ्यला बःप दने दु । (त्वये दने श्व

पुलां भासं श्वयात बःप, ओप दनावः छ्यला दु ।
ढ्वः- ढ्वदये । ढ्वःलने ।
म्वय् - म्वय् श्याये । स्वय् द्याये । म्वय् हिले ।
१५. ह्याउँ, वाउँ, चाकु, माकु इवलया विशेषणवाची खँग्वः नं
क्रिया जुयाः ढ्वलनाचवंगु दु । श्व क्रियाग्वः भिथि दु । न्ह्यतँग्वः
रूप ढ्वनेबेलय् श्व क्रिया नं न्ह्यतँग्वः घाना क्रिया इवलय् ढ्वने ।
१५क. क्रियामूल - उँ अनुसार खिउँ खिउँये । ख्वाउँ - ख्वाउँये ।
पाउँ - पाउँये । वाउ वाउँये । याउँ - याउँये । ह्याउँ -
ह्याउँये । ह्याउँसिन्हः हिकुसिन्हः जुयाः ढ्वलंगु दु । पाउं श्व
भवगत्यायात नं छ्यलावःगु दु । अथे हे आसिल पाउँ व हे इवलय्
ह्याः पाउँ त्वने नं छ्यलावःगु दु । ल्यासे पाउँ न दनि ।
१५. क्रियामूल - कु अनुसार इकु इकुये । चाकु चाकुये । चिकु-
चिकुये । ताकु - ताकुये । थाकु थाकुये । फाकु- फाकुये ।
माकु -माकुये । हाकु हाकुये ।
चाकु नं चिनि, साखः व चाकु कथं श्व चाकु न छताजि नसा
जूवंगु दु । अथे हे चाकु माकु नितां छ्यला चाकुमाकुसि छताजि
सि जुयाः ढ्वलंगु दु । थथे हे चाकुसिमाकुसि ।
१५ग. क्रियामूल - चु अनुसार कुचु-कुचुये । क्वाचु - क्वाचुये
नचु-नचुये । पिचु पिचुये । यचु -यचुये । वंचु - वंचुये । सिचु
-
-सिचुये । सुचु - सुचुये ।
१५घ. क्रियामूल - तु अनुसार क्यातु - क्यातुये । क्वातु-क्वातसये ।
ख्वातु- ख्वातुये । भ्यातु - भ्यातुये ।
१५ङ. क्रियामूल - तु अनुसार त्यानु -त्यानुये । प्यानु - प्यानुये ।
१५च. क्रियामूल - पु अनुसार अःपु- अःपुये ।
१५छ. क्रियामूल मु अनुसार च्वामु च्वामुये । लुमु - लुमुये ।
च्वय्या उँ अनुसारया ह्याउँ, पाउँया ह्यामुये, पामुये क्रमं धयावःगु
दु ।
श्व स्मरणीय खँ जुल ।
१५ज. क्रियामूल - य्, इ अनुसार - खाय् - खाइये । तुय् -
तुइये पियू - पिइये । भुय् - भुइये । सियू - सिइये । खाय् -
खाइसि, खालुयात नं ढ्वने । भुयू - भुइसिन्हः धकाः म्हः सिन्हःया
पर्यायवाची जूगु दु ।
१५. क्रियामूल - लु अनुसार -उलु- उलुये । छ्वालु छ्वालुये ।
न्यालु - न्यालुये । पालु - पालुये । सालु - सालुये । स्वालु -
स्वालुये । ह्वालु - ह्वालुये ।
पालुये - पालु नं छता मसला कोटीया नसावाची खंग्वः जूवःगु
दु । अथे हे ह्याउँपालुख्वाः खँग्वः पिलूवःगु दु ।
१५झ. क्रियामूल -सु अनुसार -इसु इसुये । उसु - उसुये ।
छ्वासु छ्वासुये । म्हासु - म्हासुये ।



बरुं जिगु सर्गः या छगू दसि खः

पूर्ण वैद्य

न्हिया न्हिथं

जिं बखुंयात कीगः हवलाः

थःगु जाप्ययलं

थः चवनागु थासं ।

बखुं जिगु सर्गःया छगू दसि खः

बखुं जिगु मतिनाया छगू सन्देश खः

उकिं हे ला बखु, जीवन छगू आकांक्षा खः

अथे नं कुं जाःगु सर्गतं हे

थौ वयात लिनाचवन

विष्फोटया मिठवालां

थौ वयागु पपू मिं नयाचवन ।

निकट मृत्युया आशंका भःभः न्हूम्ह बखुं

जिगु ब्वहल्य् जूवयाचवन

जिगु ल्हाः पाय् क्वाहाँ वयाचवन

बम बारुदया मिठवालां

गनं ख्येय् श्वयेगु थाय् मखना आतय् चाःम्ह बखुं

जिगु हे संत्रस्त आत्माया अभिव्यक्ति खः ।

जि नं वयागु छगू बल्लागु सुरक्षित गः दयेकेत सनाचवना

श्व हर-सेकेण्ड लिमलाक एक्सपोर्ट - इम्पोर्ट जुयाचवंगु

बम- गोलिया बाकसत स्यंकाः

ज्वयेकाचवंगु ततःधंगु चुपिया दाफत स्यंका ।

भीगु म्ह्य् चुपि घायेगु थाय् दुगु हे

भीगु छैय् चुपि सुचुकेगु थाय् दुगु हे

दकले तःधंगु खतरा मुना तयेगु ला खः

छर्गा-गोलिया उत्पादन बखुं लहियेफुया तर्क न्ह्यः ने

बम-मिसाइलया वालं बखुं रक्षा घायेफुगुया खँ न्ह्यःने

अन्तत, श्व छगू सत्यया अंश खः

‘छर्गा नयाः बखुंया म्वाये मफु

बारुदया मिड् बखुंया ख्येय् श्वये मफु

विषाक्त कुं जाःगु सर्गतय् बखुं ब्वये मफु ।’

सुनां धात्थे अन्न सयेका ह्वयेफु

थःगु हे जाप्येयलं

सुनां धात्थे गोलि गठ्ठाया बाकस स्यंकाः

बखुंया गः दयेकेफु

धात्थे ला वं हे बखुं लहियेफु

न्हिया न्हिथं

जिं नं बखुंयात कीगः हवलाः

थःगु हे जाप्येयलं

थः चवनागु थासं

थःगु परिश्रमं

वयागु सुरक्षित गः छगू दयेकेत स्वयाचवना

लाःसा बखुंया ला सवाः थूपिनि न्ह्यः ने

जि नं शिवि जुजुं थें थःगु ला हि हे पाये थमालेमा

बखुंया सुरक्षाया लागिं

सकसितं मदयेक मगाःगु जिगु सर्गः या लागिं

सकसितं मदयेक मगाःगु मतिनाया सन्देश लागिं ।

(गव्यस्वां ५:५: ११०७)

**खवप नगरपालिकाता न्ह्याबले सफा,
सुगधर तय्गु सकल नगरवासीतय्गु कर्तव्य खः ।**

तस्कं लीमलाम्हा खप दे - सञ्जीव उवंगल

जि बुगु, न्ह्यलः, म्हेत, तःहिक जुगु जिगु खप दे । ड्युदा स्वयो अपः जीवन फुकागु खप दे । ल्यं दःगु जीवन नं थाना हे फूक्य् मःगु जीगु खप दे । थः बुगु थाय् थः ता तस्कं माया वां । जिता जक मखु थः बुगु थाय्या चा, फय्या सुगन्ध गुलिजक नास्वाइ, लुमांक्य हे मफय्कः ।

मंसिर १ गते शनिवार नागरिक न्हिपौ सं उपेन्द्र लामिछाने जुं खपय् ग्वसः ग्वयो च्वंगु मंसिर २८ निसें पुस २ गते तक जुइगु 'खप महोत्सव २०८१' या व्यापक खाँ च्वयो छुपु ताः हाकगु च्वसु पिथाड दिल । वयकया च्वसु ब्वनय धुंकः जि खपयतानं देश विदेशी भाइपुं अलय खपया कला, संस्कृति व सभ्यताता माया याइपुं पाहांपिन्ता लसकुस याय्ता भी खपयतनं आय्बुक च्वडा धःसां पाइमखु । नपां जिमिगु ब्वनाता डाल भाय्ता नं सकलसिता मधः सें च्वनय् मफूत ।

पुलांगु प्राचीन ऐतिहासिक नपां सांस्कृतिक नगर खपया कला संस्कृति व सभ्यता च्वजाय्केता भी खपबासी पिसं थः भःपिय मफूसा लज्या उप मेगु छु जुई धाय्गु मति वांकः बिल लामिछाने जुं अलय छुं च्वय्गु मति जायो वल ।

खप नगरपालिकां न्ह्याक्य तांगु थ्व न्हापांगु महोत्सव धःसा मखु । न्हापांगु भक्तपुर महोत्सव २०५४ सालय यागु खः जिं नपालांगु विदेशी पासापिसं उब्लेया तःजिक हांगु 'खप महोत्सव' स्वय धुंक जिमिता इलय व्यलय् खपय वय्ता घ्वाडः च्वनिगु धायोदिल । अपलं सिनं तःकःहे खपय् चाह्य् वयागु नं धायो दिल ।

खप नगरपालिकां खपया ऐतिहासिक, सांस्कृतिक, सम्पदा ल्यंकः म्वाक भिंकः तःगु जक मखु, न्हाडः वानय तांगु कला संस्कृतिता हकनं म्वाकः हयो पिब्वयो तःगु सकसिनं स्यूगु हे खाँ खः । उकिया ग्यसुलागु दसु थ्वहे याय् तांगु महोत्सवय् स्वय दै । गुलिं थासय् सम्पदा ल्हवन्थ-कानय् ज्याखय् नगरपालिकाता तस्कं थाकुगु व काथं मछिगु नं द । खपया जनतां फयां फक्व थजगु ज्याखय् ग्वाहाली नं याडः वगु दः ।

खप नगरपालिकाया प्रमुख सुनिल प्रजापति धायो दी - 'खपया कला संस्कृति व सभ्यता ल्यंकः म्वाकः तय्गु व भिंक तय्ता नेपाल मजदुर किसान पार्टीया नायो भाजु नारायणमान बिजुक्छेँ (रोहित) जुं २०५९ सालय च्वयो द्यूगु 'सच्छिदा लिपाया खप दे' साफूता लौपु काथं कायागु खः ।' थ्वखाँ खं जिता छुपु पुलांगु खाँ लुमाडः वल, २०७७ साल पाखय्या । उगु इलय जि व जि कायया दश्वी छुपु सम्भौता जुल । वयागु परीक्षा बांलासा फोन छगः स्मार्ट फोन न्यायता जिं स्वीकृति बियगु । परीक्षाया लिचवः नं बांलाता, फोन नं न्यात वं ।

कोभिड १९ या लकडाउनया ई खः । बहनी थाय् निसें हःसः जूपुं हे मदयो सुनसान जुइगु त्व-त्वाल्य । काय् भाजु खप

नगर चाह्य् वान, न्हुंगु स्मार्ट फोन ज्वड । कोरोनाया इलय फुर्तीयाडः मग्यासं चाहिलय्गु वयागु पुरुषार्थ थें खः गुगु तस्कं ग्यापुगु नं जुयफः । वं नगरया नेपा प्यपा किपा कायो हगु जुयो च्वना गुगु छँ थ्यडानिं जितानं क्यना ।

व किपात मध्ये सुनसान तचपालय्या दतात्रयया नेपा प्यपा किपा ल्वः वाना पुसे च्वंगु तस्कं बांलागु किपा खानय् वं नारायणमान बिजुक्छेँ जुं च्वयो द्यूगु वहे 'सच्छिदा लिपाया खप दे' साफू लुमांसे वल । माल हकनं पुइकः ब्वडा । वयकलं कन्हेया खपया ल्वः पहः गथे जुयमः धायो भीगु हे परम्परागत पहलं दय्के ब्यूगु कलात्मक छँ या च्वज्या (स्केच) छतिं हे मपा अथे अथे हे च्वं । काय् भाजुं कायो हःगु किपा खय । जिता बिजुक्छेँ जुया कल्पनाशीलतां तहांगु लिचवः लात । अलय थानाया ग्वाहालीमिपिनिगु ज्यापा (निपुणता) खपया सिंकःमि, डकःमिपिनिगु सिप, दक्षता अलय खपया जनताया साथ ।

वयकलं खांक द्यूगु म्हागसया गुलिं प्रारूप गुलियां स्वय दय् धुंकल । बिजुक्छेँ जुं द५ दाया बैसय थ्यनय धुंकल । अः नं ल्याम्हो पुंथे हे देश व जनताया लागिं थाकु मचसिं मदिव्क जुयो च्वंगु दः । गुब्लें गुब्लें वयक नपालाइबलय धायो दीगु देश व जनताप्रतिया चिन्ता, उकिहे लगय् जुयो दीगु भाव स्वयबलय यां थः ता थमं हे मछाल वैगु थः धेके थें लिफिलिफी च्वडः च्वडागुलि । न्ह्याब्लें लिइमलाक खपः व खपया जनताया भिं या लागिं थ्व हे वयकया न्हि ज्या नं । धात्थें हे च्वछाय् बहजु वयकया लिपा थ्यंकया बिचः (दूरदर्शिता) अलय कन्ह्य् गथे याय्धायगु म्हागस (कल्पनाशीलता) अलय देशया बारे चिन्ता ।

वयकया अभिभावकत्व दःगु खप देया कला, संस्कृति सम्पदा ल्यंकः म्वाकः व भिंक तय्गु ज्या व लिपा जुइगु ज्या ब्वस्यलागु काथं नमूना जुयो च्वंगु दः । देशया फुक्क स्थानीय निकाय स्वयो नगरपालिका उलि च्वजायो च्वंगुया म्हासिइका सदां पिब्वयो च्वनय् छाय् मफै ? न्हिया न्हिथं धाय्थें देया थी थी स्थानीय निकायया जनप्रतिनिधिपुं खपय् स्वःभाइगु, वयक पिन्ता लसकुसयाय्ता, थानाया च्वन्ह्याकः च्वंगु ज्यात कानय्ता नगर प्रमुख सुनिल प्रजापति व उप प्रमुख रजनी जोशीया न्ह्याब्लें लिइमलाक जुयो च्वंगु दः ।

अथेतुं चाह्य् वगु यां खै मखु वयकपुं लिइ मलापुं जनप्रतिनिधिपुं । छुं छुं सय्क थःथःगु स्थानीय पालिकाय नं थजगु हे योजना छ्यलय् फःसा छुं भाति हज्याय फैला धाय्गु तातुनां हे जुयमः धाय्गु जिगु बिचः खः । बांलागु ज्या याता बांला धाय्ता नुगः स्याय् म्वः । थुकी सकल सिता बांलागु ज्या याय्ता घ्वासा नं बियो च्वंगु दः ज्वी नी ।

(मंसिर ५ गते या पिथनाता भाय् हिला सं.)

धाथेंगु खप, खप महोत्सवय् स्वय दै

- उपेन्द्र लामिछाने

खप दे धाय्वं अपलं मनुतय् मिखा हःनय दाँ वै-मल्लकालीन ड्यडापा इयो दरवार, डातापोल्हँ, तःपुखु अलय लुँधवाखा दःगु लाय्क्या लागा । खप दे थुलिखय् जक पू वानि मखु । कला, संस्कृति व सभ्यतां जायकः म्वाडः च्वंगु खप दे, सुथाय् दाडः वयवं खानी बलय् खपयतय्ता हे न्हँ खानय दै । अजु चाय् पुक । लच्छि बःछिया छकः वैगु नखा-चखा, सांस्कृतिक पर्व, दाफा भजन, परम्परागत प्याखंत, अलय न्हपानिसें याडः वगु ज्या चाभाला छियगु, वास्तुकला, हस्तकला थजगु थी थी ज्याखं याडः खप देता 'म्वाडः च्वंगु कला-संस्कृतिं जःगु-महोत्सवै- महोत्सवया खप दे दक म्हासिडकः च्वनि ।



थ्व हे खप देशं मंसिर २८ गते निसें पुस २ गते तक डान्ह्या तःजिगु खप महोत्सव ग्वसः ग्वयो च्वंगु दः ।

खपया कला, संस्कृति, म्वायगु पहः, व थःगु हे थासय् सयकगु उत्पादनता च्वजायकः देशं दुनय व देशं पिनय्या पर्यटकपिनिगु मन क्वसायक खपय सालयगु तातुडः मंसिर २८ गते निसें खप महोत्सव याय्गु खाँ खप नगरपालिकां धायो च्वंगु दः । डान्हू तक जुइगु थुगु महोत्सवय् धाथेंगु खप गथेच्वं धाय्गु स्वय्गु न्हँगु मौका नं दै ।

नगर प्रमुख नपां महोत्सव मू समारोह समितिया कजि सुनिल प्रजापति जुं पर्यटन उद्योगपाखं नगरया आर्थिक ज्या इवः तः हज्याक नगर व नगरबासी पिनिगु आर्थिक विकासय् घ्वासा ब्रियगु महोत्सवया मू तातुना खः धायो दिल । खप दे थःगु हे कला व संस्कृतिया तः मिगु थाय् खः धायोदिसे अः वयो थ्व ज्ञान विज्ञानं नं जायो वगु दः धायो दिल ।

खप दे च्वजायकेता नगरपालिका मदिकक हज्याडः च्वंगु दः धायोदिसे वयकलं अः क्यनयगु ई नं वगु दः धायोदिल । थ्व महोत्सव जिमिसं याडागु ज्या क्यनयगु मौका नं खः धायोदिसे थुकीं वगु सुभावावत न्यडः जिपुं अजनं हज्याड वानय् । थानाया किसान तयगु भकारी अन्न जक मखु अः ज्ञानं नं जायो वगु दः वयकलं धायोदिल ।

महोत्सवया मू तातुना खपया कला, संस्कृति, सम्पदा व थःगु हे उत्पादनयाता च्वजायकः यंक देशं दुनय व देशं पिनय्या पाहाँ पिनिगु मनक्वसायके थफः धाय्गु खः दक वयकलं धायोदिल ।

वयकयाय् थें हे बिच प्वंकः दी उप प्रमुख रजनी जोशी नं । वयकलं खप महोत्सवता नगरया थी थी ज्या इवः ब्वयगु मौका काथं न्ह्याकय्गु अलय खप नगरपालिकां पूखां दय्क तकगु अम्ल्य सम्पदात ल्यंकः म्वाक भिंकः बांलाक तयो खपय पर्यटन उद्योगया लिधंसा दयकः यंकागु खाँ काडः दिल ।

खप महोत्सव सचिवालयया कजि गौतम प्रसाद लासिव जुं महोत्सव न्ह्याकयता अःतक याय् धुंगु ज्यात बःचा हाकलं क्यडः दिसे तःजिगु महोत्सव जुइगु खाँ काडः दिल । महोत्सवय् ३२ थ्व विधा चय्थाय् जुइगु अलय महोत्सवया लसताय् खप नगरपालिकां खः पौ (स्मारिका), किपा सफू ब्वज्या याय्गु कुतः नं जुयोच्वंगु खाँ ब्याकसे वयकलं २०७६ सालय कोभिडं याडः दिक्ु याय् मःगु महोत्सव थुगुसी तःजिक हानय्गु खाँ नं काडः दिल ।

महोत्सवया इतिहास

खप नगरपालिकां इलय-व्यलय तःहांगु-चिच्याहांगु महोत्सवत ग्वसः ग्वयो वगु दः । २०५४ साल कार्तिक ६ गते निसें १० गते तक डान्ह्या 'खप महोत्सव' व २०६९ साल असोज ६ गते छन्हू 'भक्तपुर सडक महोत्सव २०६९' २०७६ पुस १६ गते 'सन्ध्याकालीन सांस्कृतिक सम्पदा पदयात्रा नपां स्थानीय उत्पादन ब्वज्या, २०७९ चैत्र १८ व १९ गते 'सम्पदा पदयात्रा व स्थानीय उत्पादन नपां घरेलू मेला, २०८० साउन २० गते 'भक्तपुरया पुखु या पदयात्रा मेला व २०८० पुस १४ गते 'बहाबही पदयात्रा व योमारी उत्सव' तः लाक हानय धुकल । उकि नगरबासी पिनिगु नं दुग्यंगु ग्वाहाली यासे अपलं दुतिंगु नं जुल ।

सच्छिद्व पीखुगूगु ख्वप पौ, बःखि पौ(पाक्षिक)

ख्वप नगरपालिकाया ग्वसालय हे २०५६ सालय 'युनेस्को कल्चर हेरिटेज म्यानेजमेन्ट एन्ड टुरिज्म' विषयया अन्तरराष्ट्रिय सम्मेलन जुगु जुल । महोत्सव नगरपालिकां ग्वसः ग्वसां नगरया सकलें तःजिक ग्वाहाली नपां सहभागी जुइगु खाँ प्रमुख प्रजापति जुं धायोदिसे -थानाया महोत्सवत धात्थें खयकः म्वाकः च्वंगु दः, महोत्सवया इलय सर्वसाधारण जनतां क्यंगु उत्साह व अमिगु लसतां नगर अज हे जीवन्त खानय दैगु खाँ नं ब्याक दिल ।

महोत्सवया तातुना

ख्वपया कला, संस्कृति, सम्पदा व थानाया थः मनं हे दयकगु, सयकगु उत्पादन नपां म्वायगु पहः देशं दुनय व देशं पिनयया पाहाँ पिन्ता क्यडः ख्वप देता पर्यटकपुं छकः मवसें मगागु गन्तब्य स्थल काथं हछ्याडः पर्यटन उद्योग पाखं नगरया आर्थिक ज्या इवःत बल्लाकः नगर व नगरबासीपिनिगु आर्थिक (दुथा) विकास बल्ला क्यता ग्वाहाली याय्गु महोत्सवया मु तातुना खः ।



महोत्सवया मेमेगु तातुनात मध्ये थानाया थीथी प्याखंत, बाजागाजा, हस्तकला, घरेलु उद्योग, सिप, कला, संस्कृतिता च्वजायकः यंकय्गु नपां थुकीता धेबा आर्थिक ज्या इवः नपां स्वायता मःगु लकस दयक यंकय्गु खः । ख्वपया थः थाय् च्वंगु नसा ज्वलं संस्कार व जीवन शैलीया खाँ ज्या प्रचार प्रसार याडः थुकीता व्यवसायीकरण याय्ता मः काथं अः पुक यंकयगु नं खः ।

महोत्सवया स्वय लाइकगु ज्या इवः त

ख्वपय् न्हिया न्हिथं छगू नं छगू सांस्कृतिक ज्या इवःत क्यडः हे च्वनि । नगरया त्वालय-त्वालय थी थी ज्या इवःत न्ह्याकः दे ब्याक उत्सवमय याडः नखाथें डाय्केगु नगरपालिकाया कुतः खः । छगू छगू दबुली, चुकय् थी थी ज्या इवः त न्ह्याकिगु उकिया खाँ मोबाइल एप्सपाखं अःपुक क्यनिगु कुतः नं नगरपालिकां यागु दः । फाडपुं पाहाँ पिसं ब्रोसर व मोबाइल

एप्सपाखं छु त्वालय वा चुकय् छु ज्या जुयो च्वना धाय्गु सिड्केफैगु व वहे काथंया थःगु पला न्ह्याकय फैगु नगरपालिकां धःगु दः ।

थुगुसीया महोत्सवय् बाँसुरी बाजाया धिंधिंबल्ला, भजन, नौबाजा, नगरा थाय्गु, पुलांगु व न्हूंगु प्याखंत दैगु खाँ ग्वसाखलं धायो च्वंगु दः । अथेहे पौभा किपा, च्वकिपा, छ्वालीकला, परम्परागत वस ज्वलं ब्वज्या नं याई । हलिमली, योमारी, परम्परागत बाजा गाजा ज्वलं, घरेलु उत्पादन, काछियगु पुलांगु पहः, कुमारी (स्वाम्हा द्यो), दिपंकर बुद्ध, नवदुर्गा, शैक्षिक, चाया भाला छियगु ज्यात ब्वय्गु खः । भीगु परम्परागत कासात, नेवः तय्गु म्वाय्गु पहः (जिवन शैली), नौबाजा, बौद्ध पिथनात, सहकारीया ज्या इवः त बुंसैगु अन्नत(कृषि उत्पादन) साफू ब्वज्या, बुद्ध अस्तु, कासा, न्हाया काथं चिकं काकिगु, सांस्कृतिक जात्रा पर्वया नमूनात क्यनि । महोत्सवय नसा ब्वज्या, व्यापार मेला, धौ महोत्सव, नौका विहार, वाटर साइक्लिड, बाल मनोरञ्जनात्मक (मचा तय्ता लसतां जायकिगु) ज्याइवःत नपां कासा नं जुई ।

ख्वप महोत्सवता व्यवस्थित व तःजिक हानय्ता नगरपालिकाया सकल जनप्रतिनिधिपुं, जिल्लाया सकल कार्यालय प्रमुखपुं, निजी लागाया संघ संस्थाया प्रतिनिधिपुं व मेमेपुं स्वापु दःपुं मुडः १६१ म्हासिया 'मूल समारोह समिति' २५ म्हा दुजः दःगु निर्देशक समिति' थी थी हिंस्वंगू विषयगत समिति व छगू सचिवालय समिति निःस्वांगु खाँ नगरपालिकां धःगु दः ।

छाय् वानय्गु ख्वपय्

ख्वपया थःगु मौलिक सांस्कृतिक म्हासिड्कात हानय्गु काथं सन् १९७९ सं युनेस्को ख्वपया लाय्कु नपां सम्पदा लागाता विश्व सम्पदाया धलः खय् नां जायकगु खः । ख्वप नगर ख्वप जिल्लाया प्रशासनिक केन्द्र जक मखुसें नेपःः याय् हे ऐतिहासिक व सांस्कृतिक केन्द्र काथं नं म्हासिका पिब्वयो च्वंगु दः ।



सच्छिखत पीखुगूगु खवप पौ. ब.खि पौ(पाक्षिक)

थानाया इलंद पुलांगु मथः, देगः, बहाबही, देवालय, शिवालय, पीठ, द्योछें, दरबार, सत्तः फल्चा, ल्वहें हिति, तुंथि हलिमयया ज्वःलागु वास्तुकलाया नमूनात खः। दायें लाखौ देशं दुनय् व देशं पिनय्या पर्यटकपुं थानाया मूर्तिकला, चित्रकला व धातुकलाया चवजःगु कलात स्वयो मन लुदांकः वानि। खवप नगरपालिकां पुर्खा दय्क तकगु व धेबां कायमरुगु सम्पदात ल्यंकः म्वाकः भिंकः तयो उकिता छ्यलः खवपय् पर्यटन उद्योगया लिधंसा काथं हज्याडः च्वंगु दः, कला, संस्कृति व सम्पदा मानव सभ्यताया कथं खः। ऐतिहासिक व सांस्कृतिक सम्पदाया महत्व व थुकिता गथे भिंक छ्यलय्गु धाय्गु खाँय् जनता ग्वाकय्गु ज्यातः थजगु ज्याखय् जनताया ग्वाहाली व साथ कायो हज्याक च्वंगु दः। न्हँगु पुस्ताता खवपया थःगु मौलिकता नपां म्हासिइके बियो थुकिता महत्व थुइके बियता, नगरया छगु तगिं निसें च्यागु तगिं तकया ब्वनामिपिन्ता स्थानीय पाठ्यक्रम दयकः ब्वंक वयो च्वंगु दः।



खवप नगरपालिकां 'पुर्खा दयक तकगु सम्पत्ति, भोगु कला व संस्कृति' या नारा कःघाड, थानाया मूर्त व अमूर्त सम्पदाया लिधंसाय पर्यटन उद्योगत चवजाय्कः सहरया आर्थिक विकासय् ग्वाहाली जगु धःगु दः। थुकी खवप देता सुचुकुचु, सम्पदा ल्यंकः म्वाकः तय्गु, सामाजिक विकासया नमूनानगर काथं हछ्यायता स्थानीय जनसहभागिताखय् कला, संस्कृति व सम्पदा ल्यंकः म्वाकः तय्गु ज्या हज्याक च्वंगु दः।

डातापोल्हें, भैलदेगः, सिद्धपुख, लक्ष्मीनरसिंह देगः, न्हँपुख (रानीपुख), भाजुपुख, चर्तुब्रम्ह महाविहार, भौर वही, बेतःद्योया देगः, इन्द्रायणी द्योछें नपां त्वाल्य त्वाल्यया फल्चा सत्त, मथ, ल्वहेंहिति, तुंथि, पुख, बहाबही नपां सच्छिखू मयाक सम्पदात ल्वनय् कानय् व दानय् धुंकगु दः।

खवप नगरपालिकां पर्यटन उद्योगया लागिं मःगु दक्ष जनशक्ति ब्वलांकयता विदेशी भाय स्यनय्गु, कम्प्यूटर व पाकशिक्षा (जवरय याय्गु) थजगु लाहातय ज्या दैगु तालिमत

मदिक्क न्ह्याकः च्वंगु दः। स्थानीय लॉजुव तयता तालिम बियो परिचालन समिति पाखं लॉजुव पिन्ता अनुशासित व मर्यादित यायां खवपया पर्यटन उद्योगता बांलाक हज्याकः वगु दः। अपलं थःगु पहः (बहु आयामिक) दःगु खवप देया नमूनाया पहः स्वयगु खः सा थुगु महोत्सव दकलय चवजःगु मौका जुइगु खवप नगरपालिकाया मति खः। अथेयां भक्तपुर महोत्सव थें हे खः नगर प्रमुख प्रजापति जुं धायो दी - थुगु महोत्सव ब्याकः खवप दे ता छकलं निश्चित थासय् क्यनय्गु कृतः याडागु दः।

(१ मंसिर २०८१ या पिथना पाखं भाय हिला-सं.)

बेक्वमतिं

- आशाकुमार चिकंवाजार

गुणकेशरीया जीवनय् भिं सुथः गुब्लें मव। अथेयां वं ज्या मसांगु छु नं मरु। कतया छँ भाला स्यू वानयगु, बाँ पु वानयगु, हिजा हयू वानयगु थजगु ज्या नं प्वा थानयता मयासिं मगा। सुयां मचाबुसा चिकं बुक वानयगु नं ज्या यो वानिगु। उकिं वगु नेगः प्यगः धेबां मचातयता नकय् तिइके व ब्वंकयता खर्च याइगु। अथेयां वया भःत मरुगु मखु। दयां छुयाय् दः धाय्गु जक। त्वडः वै, म्वमरुगु खाँय् ल्वापु थै, जीवनं गुब्लें चितासु मरु।

वयागु दुःख खाडः छँ ज्या साँ वानिथाय् च्वंम्हा छम्हा मनूनं थुगुसी वयागु बुई छ्व हवः हँ दक धाल। दयां स्वयो नं छ्व हवलः छुं फाइदा मरु धायगु सियो छुं हे कुत मकःसिं छ्व हवय्कगु खाँ गुणकेशरीं स्यसां अन्न भाति भाति दःसा थः मचातयगु प्वा द्यालाई मखुला धाय्गु मतिं लिपा ज्या वयो पुलय्गु धाधां गुम्हासिके छ्वपुसा, गुम्हासिके देसी सः त्याडः हयो छँ मुनय् हल। बुँज्या सानयता क्, तःकू छुं छुं हे मदय्क भःत म्हासिं बन्धक तयो ऐला त्वनय् धुंकल। उकीं गुणकेशरीया ट्याक्टरं बुँ पाल तकगुलिं तःकु ड वाडः च्वन।

छँ भःतम्हा नानाथरी म्हुतु ल्हाल्हां थः मिसाता ब्वः बियो च्वन। तः कु ज्वडः छँ व बलय् भः तम्हा स्यें स्यें धाय्कः हाल च्वंगु खाडः थौं धेबा गनाकायो त्वडः वला दक थःगु म्हिचाय् धेबा स्वत। धेबा दः। व हत्त पत्त छँ उखें थुखें स्वः जुबलय् वं छ्व पुसा तयो तया थाय् छ्वः पुसा मखान। थाना च्वंगु छ्व पुसा गवः ? भतम्हा सिकय् न्यन। वं न्हयसे प्यसे धाधां त्वा आँ याडः थाना क्वहँ वान जक क्यन। हरे ! कतयाय्के त्याडः हयागु छ्व पुसा हे बाकी मतःसिं मियो ऐला त्वडः वम्हा भःत खाड गुणकेशरीता काँथुइ छवसिमां सुत्तुसगु थें जुल।

ख्वप नगरपालिकाया ज्या भवः त

प्रवासं ल्याहाँ वपुं चिनियाँ महासंघया पुचः ख्वपय्

कार्तिक २९ गते

प्रवासं ल्याहाँ वपुं चिनियाँ पिनिगु महासंघया पुचलं विहिवार ख्वपय् भायो चाहिल दिल । ख्वप नगरपालिकाया प्रमुख सुनिल प्रजापति जुं महासंघया न्वकु छड स्यूए युआनया न्ह्यलुवाय् भःगु पुचता ख्वपया लायकु धवाकाय् स्वंहू बियो, तकातपुली पुइकः खादा अलय पुतुम्हिचा बियो लसकुस याडः दिल ।



नगरप्रमुख प्रजापति जुं चिनियाँ नेतापिसं ख्वप देता ह्दाय तयो चाह्यु भः गुलिं लयता प्वकसे ख्वप नगरपालिकां थानाया कला संस्कृति ल्यंकः म्वाकः तयगु ज्या ह्दाय तयो ज्या साडः वगु खाँ काडः दिल । नपां वयकलं थजगु भ्रमणं नेपमिपुं

व चिनियाँ पिनिगु स्वापु भन क्वातुयो वानि धायो दिल ।

वहे इवलय प्रवासं ल्याहाँ भःपुं चिनियाँ महासंघया न्वकु छड स्यूएयुआनं सभ्यता व संस्कृतिया कालबिल पाखं देया क्वातुक्क यंकय् मःगु खाँ ब्याकसे ख्वप दे दुयंगु सांस्कृतिक जग दःगु कलात्मक सहर खः धायोदिसे चीन व नेपः या स्वापु इतिहास क्वति हे पुलां धायोदिल ।

सांस्कृतिक कालबिल पाखं चीन व नेपःया दश्वीया स्वापु अज ह्छ्याडः यंकय् मःगु खाँ व्याकसे वयकलं ख्वपया सम्पदा ल्यंकः म्वाकः तयगु ज्याखं थः पिन्ता बांलागु लिचवः लागु खाँ नं काडः दिल ।

नगरप्रमुख प्रजापति जुं न्वकु भाजु स्यूएयुआनजुयाता 'म्हवय्खा इयो' व नगरपालिकाया पिथनात उपहार काथं लः ल्हाडः दिल ।

उगु प्रतिनिधि पुचःलय् महासंघया चु ल्यड, लीन सिया ओफान, चाओ रूओछन्, वाड सड हई व चिनियाँ दुतावास पाखं काउन्सेलर छिन वनछ वाड तोड, नेपाल प्रवासी चिनियाँ संगठनया नायो चीन सियाओताडः पुं भःगु खः ।

उगु पुचलं ख्वपया लायकुलि च्वंगु राष्ट्रिय कला संग्रहालय, लुँधवाका डय्डपा इयो, सिद्धिलक्ष्मीया देगः, चतुर्ब्रम्ह महाबिहार, स्व स्व तःमाहीया डातापोल्हँ, भैल देगः, गःहितिया लक्ष्मी नरसिंह देगः, तालाकवय् चाभाला छिडः च्वथाय् भायो स्वयो दिल ।

न्ह्यलुवा कार्यकर्ता पिसं देश विदेशया थी थी साफूत ब्वनय् मः

मंसिर ९ गते

नेपाल मजदुर किसान पार्टीया नायोभाजु नपां वरिष्ठ राजनीतिज्ञ नारायण मान बिजुक्छँ (रोहित) जुं देश व जनताता भिं याय्ता ल्वाइपुं, आन्दोलन व संघर्षय् ब्वति काइपुं कार्यकर्ता व देशभक्त जनता ब्वलांकय् मःगु खार्ये बः बियो दिल ।

पीप्यकगु नेपालभाषा साहित्य तःमुंज्याया सांस्कृतिक ब्वज्या सं पिब्वगु ख्याल, छधाप्याखं व हूलाप्याखं खय् च्वजःपुं प्याखं म्वँ व पूचः अलय् तः मुंज्याया ग्वसालय जूगु न्हँ देँ १९४५ या भिन्तुना ज्यालीसं दुतिपुं बाजाखलः ब्वनयकुथि, सहकारी, सामाजिक संघ संस्था पिन्ता व तःमुंज्याया सांस्कृतिक ब्वज्यासं पिब्वगु सांस्कृतिक विधाया ल्यज्यामिपुं नपां मे मेपुं थी थी



सच्छिद्व पीखुगूगु ख्वप पौ. ब.खि पौ(पाक्षिक)

सामानत बियो ग्वाहाली यापिन्ता, शिल्ड, मतिनाया चिं, व दसिपौ लः ल्हायगु ज्या इवःसं मू पाहाँ बिजुकुँ जं समाजय् भिपुं व मभिपुं पात्रत म्हासिडकः हज्याय्मः धायोदिल ।

न्ह्यागु नं पार्टीया कार्यकर्तापुं, समाजसेवी, शिक्षकपुं व न्ह्यलुवा कार्यकर्ता पिसं साहित्यिक, राजनीतिक व देश विदेशया साफूत ब्वनय मःगुलि बःयाड दिसे वयकलं सभ्य (भिगु) व स्थल्लागु (सम्मनुत) समाज निःस्वानयता समाजया नागरिकपुं दक्ष, योग्य व समाजसेवी जुयमः धायोदिल ।

नायो भाजु बिजुकुँ जं धायोदिल - प्याखं ल्ह्यगु, बाजां थाय्गु, नखा चखा डाय्केगु जक संस्कृति मखु । नाइकः बचं तयो (शिष्ट व नम्र) नुवाय्गु, नागरिक भावना ब्वलांकः सांस्कृतिक स्तर च्वजाय्केगु ज्या याय्गु नं संस्कृति खः । थजगु ज्याख्य राजनीतिक कार्यकर्ता समाजया न्ह्यलुवापुं व शिक्षकपुं हज्याय्मः अलय् जक समाज हज्याइ धायोदिल ।

मज्यगु नीति व मज्यगु ज्याया विरोध याय् फ्यके मःगु आवश्यकता काडः दिसे वयकलं देशघाती व देशविरोधी ज्याया विरोधी सकलें देशभक्त जनतां खवरदारी याय् मः धायो दिल ।

नेमकिपाया छ्याञ्जे भाजु नपां संघीय सांसद प्रेम सुवालं ख्वप देता यच्चुपिचुगु सांस्कृतिक नगर पर्यटकपुं छक मवसें मगागु थाय् दयेकेगु भी फुक्क सिया इच्छा खः धायोदिसे नेपाल मजदुर किसान पार्टीया नायो भाजु नारायणमान बिजुकुँ (रोहित) जं २०५६ सालय् छखा छँ छम्हा स्नातक दयकेगु प्रस्ताव तयो द्यगु उगु प्रस्ताव पूर्वांक छ्यलय्ता ख्वप नगरपालिकां २०५६ सालय् ख्वप मा.वि. चायकगु खः धायोदिसे २०५८ सालय् ख्वप कलेज व ख्वप ईञ्जिनियरिङ्ग कलेज चाय्केता त्रिभुवन विश्वविद्यालय लिफिलिफी च्वडः च्वंगुलिं पूर्वाञ्चल विश्वविद्यालयया सम्बन्धन कायो इञ्जिनियरिङ्ग कलेज चाय्के मःगु नपां नर्सिङ्ग कलेज चाय्केता अथेहे दुःख ब्यगु खँ काडः दिल ।

ख्वप सल्लाघारी तीनकुनेया जग्गा, ख्वपया, जनतायाय् हे जग्गा, उगु १०८ पी जग्गा अः नेपाल ट्रस्टया नामय तयो तःगु ख्वप विश्वविद्यालय चाय्केता माला दक माग याडः वयागु नं च्यादा-हिंदा हे दय धुंकल अथेनं सरकारं राजनीतिक पूर्वाग्रह तयो ख्वप विश्वविद्यालय विधेयक संसदं पारित याय्ता पेश मयागु चर्चा यासे छ्याञ्जे सुवाल जं धायोदिसे '१०८ पी जग्गा नं ख्वप नगरपालिकाता छ्ययकं वियमः, ख्वप नगरपालिकापाखं चाय्क तःगु शैक्षिक संस्थाय् देशां देछिया ब्वनामिपुं राजनैतिक पूर्वाग्रह मतःसे ब्वंकः च्वंगु दः ।

बहुदलीय व्यवस्था (पुनःस्थापना) हकनं लिप्यडः ह्यानीं स्वीडादा थुख्य्या सरकारतयसं नेपःया खुसीत भारतया मंकः खः थजगु खँख्य सही याडः टनकपुर, महाकाली, माथिल्लो कर्णाली, अरुण तेश्रो, तल्लो अरुण, अरुण चौथो, पश्चिम सेती, सेती १, मुगु, कर्णाली तिला १, तिला २, फुकुट कर्णाली भारतता बिला ।

हिं न्ह्यदा हाँ हे माथिल्लो कर्णाली कःगु भारतया जि.एम. आर कम्पनीं छँ महिना हाँ भारतया इरेडा व सतलज कम्पनीता ६० प्रतिशत शेयर मिय धुंकल । नेपः या छपु खुसीता भारतीय कम्पनीं मेगु नेगु भारतीय कम्पनीता म्यगुलिता अःयाय्म्हा सरकारं ज्यु दक समर्थन याता । थुकीं सियदः थौतक सरकारय् वापुं फुक्क नेपः या जनताया सरकार मखुसें भारतीय एकाधिकार पुँजीया कतामारी जूगु खँ वयकलं काडः दिल ।

टनकपुर मामिलासं एमालें २०४८ सालय् 'देशघाती गिरिजा, हैजाले लैजा' धायो सडक व संसदय् नारा लगय् यागु अथेनं २०५३ सालय टनकपुर नपां महाकाली खुसी भारतता बियता एमाले नं साथ बिला धायोदिसे वयकलं स्वीडादा थुख्य्या सरकार तयसं देशता २६ खर्ब ऋण क्यंकः सडक, ताँ,भवन विद्युत व टेलिफोन दयकः यंकागु धःगु खँ अः सिय दत । विदेशी ऋण कायो खरबौं भ्रष्टाचार यापुं सरकारया ख्वः महालेखा परीक्षकया प्रतिवेदनय् खानय् दःत । देया माथांवांक विकास मयासें स्वनिगलय् छँ थुडः लाँ तः ब्याकय् वं समस्या ज्यनिमखु धायो दिल ।

छ्याञ्जे भाजु सुवालं नेपाली कांग्रेसं एमसीसी सम्भौतासं अनुदान कःगु खँ कुलः दिसे बी आर आइकय् ऋण मकायगु खँ ल्हागु, अः याय्पुं सरकारं खुसी बःलं ल्हापुं व चलं वाडः ल्हापिन्थाय् विश्व बैङ्कय् २० अर्ब ऋण कायगु खँ क्वः छिगु खँ कुलः दिसे बी आर आई मानवजातिया भिं ज्यायाइगु काथं स्वापू दःगु खँ कुलदिसे विश्व बैंक, अन्तरराष्ट्रिय मुद्रा कोष, एशियाली विकास बैंक, डब्लु टि ओ पश्चिमा साम्राज्यवादीतयगु कयपुङ्गु लुसी दःगु लाहापा खः अमिगु ऋणय् दे लुकुं वितकिं देशय् अमिगु उपनिवेश याई धायो दिल ।

नेमकिपाया केन्द्रीय दुजः नपां ख्वप नगरपालिकाया प्रमुख सुनिल प्रजापति जं शासक दलतयसं ख्वप विश्वविद्यालय स्वीकृत बियता लिफिलिफी च्वडः च्वंगु खँ कुल दिसे सम्पदा ल्यंकः म्वाकः तःगु सहर सांस्कृतिक नगर ख्वप दे हलिमय्या छगू ब्वस्यलागु म्वाडः च्वंगु संग्रहालय खः धायोदिसे वयकलं विदेशीपाखं वड्गु आम्दानी काथं धिसिमलाइगु, ख्वप नगरपालिका थः हे थःगु तुतिख्य चुयगु व आन्तरिक आम्दानी अप्वय्केगु पाख्य हज्याडः च्वंगु दः धायोदिल ।

देशं दुनय व देशं पिनय्या पर्यटकपिनिगु मन क्वसाय्केता स्थानीय जनताकय् सम्पदा व कला संस्कृतिता माया, आस्था व विश्वास अप्वयक थगु धाय्गु भावना ब्वलांकय्ता सडक महोत्सव, सांस्कृतिक पदयात्रा, भीथाय् हे दयकगु, सयकगु स्थानीय (सामग्री) हलज्वलंया ब्वज्या, पूखु व बहःबही सिईकेगु व सिईके बियगु पदयात्रा नपां थुगुसी मंसिर २८ गते निसें पुस २ गतेतक डान्हुया 'ख्वप महोत्सव' याय ताडागु खँ नं काडः दिल । जनताता राजनीतिक व सांस्कृतिक स्तर च्वजाय्केगु काथं ज्या याडः च्वडागु

सच्छिद्व पीखुगूगु ख्वप पौ, बःछि पौ(पाक्षिक)

खाँ काडः दिसे वयकलं भीगु पार्टी सिद्धान्त व बिचःया लिधंसाय इमानदार जुयो ज्या साडः च्वंगु खाँ नं काडः दिल ।

थः थः गु थासं निःस्वार्थ जुयो ज्या साडः च्वंगुलिं ख्वप दे न्ह्यागुं लागाय् हनय् लाडः च्वंगु खाँ ब्याकसे वयकलं भीगु मेहनत सितिं मवां धायोदिल ।

नेमकिपाया केन्द्रीय दुजः नपां वागमती प्रदेश सभाया दुजः सृजना सैजुं साहित्यिक, सांस्कृतिक, वैचारिक आन्दोलनं जनताता ग्वाकः वयो च्वंगु तः मुंज्याया खाँ कुल दिसे साहित्य राजनीतिया स्यल्लागु ज्या भः खः धायोदिल ।

शोषण, अन्याय, दमन, असमान सन्धि सम्भौता, दे व जनताया मभिंयाइगु ज्याया विरोधय् आन्दोलित मजुसँ मगा धायोदिसे वयकलं शिक्षा, चेतना व सांस्कृतिक चेतना म्हवँ जुगुलिं कर्णालीया मिसातय्गु जीवन अःनं तस्कं दुःख पूर्ण जूगु खाँ काडः दिल ।

गांगामय व देया थी थी थाय्या गरिबी क्यडः डलर फैंपुं व डलरय् लय्ताइपुं असामाजिक तत्त्वपिसं लबः नयो दां कमेयाडः च्वंगु खाँ कुल दिसे वयकलं सरकारं जनताया समस्या स्वहे मस्वगु खाँ नं काडः दिल ।

भक्तपुर क्यान्सर अस्पतालया निर्देशक उज्ज्वल चालिसे जुं क्यान्सर ल्वय जुपिन्ता अज थप सेवा सुविधा ब्रियता मः काथंया व्यवस्था याडः वयागु खाँ ब्याकसे इलय हे बिचः याडः ल्वय सिइके

फःसा क्यान्सर ल्वचं नं लांकः च्वनय फैंगु खाँ काडः दिल ।

नेपाल भाषा साहित्य तः मुंज्या मुगुथिया नायो नपां मुंज्याया सभापति आशा कुमार चिकबञ्जार जुं थः थःगु थासं सकल सिनं ग्वाहाली याः सा समस्या ज्यंकय् फइगु खाँ ब्याकसे तःमुंज्या या दबु जनताता थी थी खाँ कानिगु एकडेमी काथं हज्याडः च्वंगु दः धायो दिल ।

पीप्यकगु नेपाल भाषा साहित्य तःमुंज्याया नायो भाजु कृष्ण भक्त लवजुं राजनीति बांला मजुतलय देश व समाजया पहः वांमलाइगु खाँ काडः दिल ।

भाय्थाकाय्गु नपां ज्या साडः नैपुं ज्यापु ज्यामिपिन्ता राजनैतिक व वैचारिक काथं ग्वाकय्गु ज्या तःमुंज्यां याडः वयो च्वंगु खाँ ब्याकसे वयकलं जनतां हे निःस्वांगु तःमुंज्याया दबुली जनताया भिं ज्याखय् ल्वाइपुं जनतातय्ता थाय् ब्रियो तःगु खाँ नं ब्याकः दिल ।

तः मुंज्या ग्वाखलः या छ्याञ्जे सञ्जय मानधरं ज्या इवः याय् मःगु या खाँ काडः दिल ।

ज्या इवःसं मू पाहाँ, पाहाँ पिसं पीप्यकगु नेपाल भाषा साहित्य तःमुंज्यासं नेहू यंक पिब्वगु सांस्कृतिक ज्या इवखय् तःलागु पुचतय्ता, न्हँदँ ११४५ या ज्यालीसं भःपुं थी थी बाजा खलः, पुचः ब्वनय्कुथि, सहकारीया पुचः पिन्ता सिरपा, मतिनाया चिं लःल्हाडः द्यूगु खः ।

सुचुकुचु ज्या इवः

मंसिर १ गते

ख्वप नगरपालिकाया ग्वासालय बःछिया छक मदिक्क याडः वगु सुचुकुचु ज्या इवः मंसिर १ गते वडा नं ४ राममन्दिर खुसीया चाकलीं यागु जुल । उगु ज्या इवःसं ख्वप नगर प्रमुख सुनिल प्रजापति जुं सुचुकुचु ज्या इवः देया लागिं हे ब्वस्यलागु ज्या इवः खः धायो दिसे नागरिकपिसं थःगु थाय् थमनं हे सुचुकुचु याय्मः धायो दिल ।

२०७४ सालं निसँ बःछिया छन्हु सुचुकुचु ज्या इवः न्ह्याक वयागु खाँ काडः दिसे वयकलं ख्वप महोत्सवय् ख्वपया



कला, तजिलजि, भेषभूषा व ज्या इवःत हलिमय अज तःजिक व्याकय्ता कुतः जुयो च्वंगु खाँ काडः दिल ।

नेपालय वैपुं थयं मथयं प्यब्वय् छब्व पर्यटकपिसं ख्वपय् चाह्यू वैगु ल्या पिब्वसे वयकलं स्थानीय पाठ्यक्रमपाखं थीथी संस्कृति व पुरातात्विक महत्वया खाँत ब्वंकः वयो च्वडागु खाँ ब्याकः दिल ।

ख्वप नगरपालिका वडा नं. ४ या वडाध्यक्ष उपेन्द्र सुवालं राममन्दिर ऐतिहासिक व धार्मिक महत्वं जःगु थाय् जूगुलिं उगु थाय्या लकस बांलाकय्गु कुतः जुयो च्वंगु खाँ नपां खुसी फोहर वाय्गु याय् मज्यूगु खाँ नं काडः दिल ।

ख्वप नगरपालिकाया प्रशासकीय अधिकृत दामोदर सुवालं न्हँगु पुस्तां सुचुकुचुया व्यावहारिक ज्ञान सय्के मःगु, ख्वप महोत्सव तःलाकय्ता थः थः गु थासं फयांफक्व अपः ग्वाहाली याय्मः धायोदिल ।

उगु ज्या इवः सं वडा नं. २ या वडाया दुजः मञ्जू मैयाँ लाखा नं न्वचु तयो द्यूगु खः ।

सरकारया फ्वंगी बुद्धि विश्वविद्यालय स्वीकृति मब्युगु

मंसिर २ गते

खप इन्जिनियरिङ्ग कलेज व खप कलेज अफ इन्जिनियरिङ्गया शैक्षिक सत्र २०८१/८२ सं स्नातक तहया इन्जिनियरिङ्ग व आर्किटेक विषय सं भर्ना जूवपुं न्हूपुं ब्वनामि पिन्ता लसकुस व अभिमूखीकरण ज्या इवः मंसिर २ गते जुल ।



ज्या इवः सं नेपाल मजदुर किसान पार्टीया नायो भाजु नारायणमान विजुकुँ (रोहित) जुं ब्वनामिपिसं ब्वनय् धुकः भ्रीगु देशय् हे ज्या सानय्गु मति ब्वलांकय् मःगु, राजनीति शास्त्रया ब्वनामिपिसं च्यान्ह्या छगु, साफू ब्वड देश- विदेशया खाँ थुइकः च्वंगु खाँ न्हि थांसे वयकलं सकल ब्वनामिपिसं राजनीति शास्त्रया विषय ब्वड थुइके मः धायोदिल ।

देया अवस्था बांलाकय्ता राजनीति बांलायमः धायो दिसे वयकलं ल्यासे- ल्याम्होपुं विदेशय् वांगुलिं सरकारय् च्वडः च्वपुं विदेशी दलाल तय्गु अपलं लाहा दःगु गुकिं देशय् ल्यासे ल्याम्होपुं म्हवँ जुयो देया विकास भनभन लिपा लाइगु नपां थव नेपःता ध्वस्तयाइगु विदेशी राजनीति खः धायो दिसे थजगु सरकारय् च्वपिनिगु फ्वंगी बुद्धी व मानसिकतां नेपाली जनतां दुःखःसियो च्वंगु खः धायो दिल ।

सरकारं ल्यासे ल्याम्होपिन्ता ज्या बियमः, बियफ, थुकिया लागीं सरकारता न्ह्याब्लें ग्यलाग्यला याडः थानयमः धायोदिसे वयकलं अमेरिका व भियतनामया युद्धया इलय अमेरिकी सैनिकं भियतनामया विरुद्ध ल्वाय्गु मन मरु धःगु खाँ कुलः दिल ।

विज्ञान व प्रविधिया विकास नपां देशय् नं अपलं विकास जुइगु खाँ ब्याकसे वयकलं चीन आर्थिक रूपं अपलं हज्यागुलि चीनय् अपलं वैज्ञानिक आकर्षण जुगुलिं खः धायो दिसे अमेरिकाया संरचना स्वयो उत्तर कोरियाया संरचना तस्कं बांलागु खाँ नपां उत्तर कोरिया पर्यटनया केन्द्र जुयो वगु खाँकाडः दिल ।

मू पाहाँ रोहित जुं खप विश्वविद्यालय चाय्केता मःगु

फुक्क पूर्वाधारत दय धुकानं स्वीकृति बियता लिपालाक च्वंगु नेपःया सरकारया फ्वंगी बुद्धि खः धायो दिल ।

कलेज सञ्चालक समितिया नायो नपां खप नगरपालिकाया प्रमुख सुनिल प्रजापति जुं कलेजया तातुना काथं बांलागु, भिंगु शिक्षा बियगु, देशभक्ति नागरिक दयकेगु व सक्षम प्राविधिक ब्वलांकय्गु ज्या जुयो च्वंगु खाँ काडः दिसे प्राविधिक पिनिगु कमजोरी देश व जनताया लागिं अपलं स्यनिगुलिं अनुशासित, इमानदार, लगनशील, मेहनती व सचेत जुयमः धायोदिल ।

वयकलं बी आर आई व एमसीसीता छपा भुइतुं तैम्हा नेपःया सरकार गजम्हा सरकार खः धायो दिसे खप नगरपालिकां सरकारी ब्वनय्कुथि व सरकारी अस्पतालता बांलाकः भिंकः यंकय् फःसा बांलाइगुलिं वहे काथं हज्याडः च्वंगु खाँ ब्याकः दिल । नपां ब्वनामिपुं प्राविधिक जक जुयो मगा लिपा वैगु जिम्मेवारी कुबिय फःपुं नपां ज्यकय् फःपुं जुयमः धायो दिल ।

कलेज सञ्चालक समितिया न्वकु नपां खप नगरपालिकाया उपप्रमुख रजनी जोशी समाजता बुद्धिजीवीकरण याय्ता खप नगरपालिका हज्याडः च्वंगु खाँब्याकसे खप नगरपालिकां शैक्षिक ऋण, कला संस्कृति ल्यंकः म्वाकः व भिंकः तय्गुलि बः याडः वगु नपां मंसिर २८ गते निसें पुस २ गते तक जुइगु खप महोत्सव स्व वय्ता नं ब्वडः दिल ।

खप नगरपालिकाया प्रमुख कार्यकारी अधिकृत वसन्त भट्टराइजुं ऐतिहासिक व सांस्कृतिक नगर खपय् ब्वँ वपुं ब्वनामिपुं अनुशासित, सृजनात्मक व च्वजःपुं प्राविधिक जुइगु आशा याडः दिल ।

खप इन्जिनियरिङ्ग कलेजया प्राचार्य ई-सुजन माकं शैक्षिक सत्र २०८१/८२ सं भर्ना जू वपुं मध्ये मिसापुं ४७५ म्हा व मिजपुं ५३५ म्हा दःगुलिं सकलसिनं तस्कं बांलाक ब्वनिगु विश्वास प्वंकः दिल ।

खप कलेज अफ इन्जिनियरिङ्गया प्राचार्य सुनिल दुवालं तनाव नपां ल्वाडः क्षमता ब्वलांकय् फःसा मानासिक तनाव मदैगु खाँ काडःदिल । खप कलेज अफ इन्जिनियरिङ्गया उप प्राचार्य रत्नशोभा प्रजापति जुं देश व जनताया भिं ज्याखय् जुयो ज्या सानयमः धायोदिल ।

खप इन्जिनियरिङ्ग कलेजया शैक्षिक सत्र २०७५ सालय् भर्ना जुयो पूर्वाञ्चल विश्वविद्यालयया २०८१ सालया परीक्षासं सर्वोत्कृष्ट जुयो डा. राम शोभाना पोखरेल स्वर्ण पदक त्याकम्हा ई. विकास पाण्डेता मू पाहाँ बिजुकुँ जुं स्वर्णपदक व नगद सिरपां हाडः दिल । ज्या इवः सं राजन जतिं नं न्वचु तयो द्युगु खः ।

हिंप्यदा क्वयया मचातयूता निःशुल्क क्यान्सर उपचार

मंसिर ५ गते

नेपः या सरकारं २०८१ मंसिर १ गते निसैं हिंप्यदा क्वयया मचातयूता क्यान्सर ल्वयया निःशुल्क उपचार यायूगु ज्या इवः काथं नेपाल सरकार स्वास्थ्य व जनसंख्या मन्त्री प्रदिप पौडेल जुं मंसिर ५ गते छगू ज्या इवः यासे भक्तपुर क्यान्सर अस्पतालय् निःशुल्क बाल क्यान्सर उपचार सेवा न्ह्याक द्यूगु खः ।



ज्या इवःसं न्वचु तयोदिसे वयकलं सरकारं कान्ति बाल अस्पताल (यें), भक्तपुर क्यान्सर अस्पताल (खवप) व बी.पी. कोइराला मेमोरियल क्यान्सर अस्पताल (भरतपुर) चितवनय् मचातयूगु क्यान्सर ल्वयया उपचार निःशुल्क यायूगु खाँ क्वः छिडः दिल ।

वयकलं क्यान्सर जुपुं मचातयता धेबा मरुधायो सीय थःम्बः धायूगु मतिं इलय हे उपचार याडः अमिता म्वाकः तयूता बाल क्यान्सर उपचारय् सेवा निःशुल्क याडागु खाँ काडः दिल ।

स्वास्थ्य व जनसंख्या मन्त्रालयं २०८० चैत्र १४ सं विश्व स्वास्थ्य संगठननपां मचा तयूता जुइगु क्यान्सरया उपचारया लागिं निःशुल्क वास कायूता सम्भौता यागु खाँ न्हिथांसे वयकलं

सम्भौता काथं नेपाल प्यदातक वास निःशुल्क दैगु खाँ काडः दिल ।

अजगु वास अःयाता भक्तपुर क्यान्सर अस्पताल, बी.पी. कोइराला, क्यान्सर अस्पताल कान्ति बाल अस्पताल व पाटन अस्पतालय् उपचार याइपुं मचातयूके क्यान्सर खानय् दः सा छ्यलिगु खाँ वयकलं काडः दिल ।

ज्या इवः सं खवप नगरपालिकाया प्रमुख सुनिल प्रजापति जुं इलय हे उपचार यायू दःसा मचातयूता जुइगु क्यान्सर ल्वय लाँकयू फँगु खाँ ब्याकसे वयकलं नेपालय् पुनिगु स्वयो मपुनिगु ल्वय अपलं खानय दःगु खाँ कुलः दिल ।

नेपालय् मधुमेह (चिनी ल्वय), ब्लडप्रेसर व क्यान्सर थजगु मपुनिगु ल्वय (भयावह) तस्कं ग्यापुक खानय दयो वयो च्वंगुलिं मपुनिगु ल्वचं मकयूकेगु गथे ? धायो नागरिकपिन्ता इलय हे ग्वाकयू फःसा बांलाइगुलिं सरकारं थजगु ज्या इवः हनयू हयूमः धायोदिल ।

खवप नगरपालिकां चायूकः तःगु ख्वय अस्पतालय् स्वास्थ्य बिमा बोर्डपाखं २० करोड तका स्वयो अपः सोधभर्ना काय ल्यं दःगु खाँ कुल दिसे वयकलं सरकारी अस्पतालता स्वास्थ्य उपकरण व मः काथंया, जनशक्ति ब्वलांक सुविधां जःगु अस्पताल दयकेता मन्त्री पौडेलया ध्यानाकर्षण याडः दिल ।

प्रमुख प्रजापति जुं धायोदिल - 'स्वास्थ्य लागता सेवा स्वयो ब्यापार काथं कःसेलिं अः स्वास्थ्य सेवा भन भन थिकयू जुयो वांगु खः । स्वास्थ्य उपचार याडः जक दायँ डागू लाख म्हा मनूत गरिबीया ध्वलं क्वय लः वांगु दः ।'

भक्तपुर क्यान्सर अस्पतालया कार्यकारी निर्देशक डा.उज्वल चालिसेया सभानायोयू जूगु उगु ज्या इवःसं वागमती प्रदेश मन्त्री सुरेश श्रेष्ठ व बालरोग विशेषज्ञ डा रीतु लामिछाने पिसं नं न्वचु तयो द्यूगु खः ।

इवाप

खवप नगरपालिका पाखं पिथाडः च्वंगु खवप पौ बः छि पौ खयू बांलागु च्वसु त बियो ग्वाहाली याडः दिसँ । उगु रचनाया ल्य ज्या याडः पारिश्रमिक बियगु खाँ खवप नगरपालिकाया २०७७ श्रावण २६ गते च्वंगु बैठकं क्वः छ्यूगु खाँ ब्याक च्वडा ।

सम्पादक
खवप पौ

विदेशी लाय उपनिवेश जुयो द्रहँ वयफ : नायो भाजु बिजुक्छँ

मंसिर ६ गते

नेपाल मजदुर किसान पार्टीया नायो भाजु नारायणमान बिजुक्छँ (रोहित) जुं विहिवार आदर्श आजाद मा.वि.या ६५ कगु व आदर्श आजाद कलेजया १६ कगु वार्षिकोत्सव ज्या इव: पानसय् मता च्याक: उलेज्या याड: दिल ।



ज्या इव: सं नायो भाजु बिजुक्छँ जुं देशय् विदेशी लाय हय मज्युगु बिच: प्वंकसे बिदेशी लाय उपनिवेश जुयो द्रहँ वययो धायोदिसे नेपालं विश्व ब्यापार संगठनय् दुज: जुय मज्युगु खायँ उब्ले थ: पिसं अपलं विरोध याडानं सरकारं न्हयप सिलिंचाय् हे मश्वकगुलिं अ:वयो शैक्षिक लागाय् विदेशी विश्वविद्यालयया सम्बन्धनय् देशय् अपलं कलेजत चाय्क: त:थाय् ब्वंसां मब्वंसां पास जूगु दसिपौं बिडुगु खॉ कुल: दिल ।

खवपया सामुदायिक विद्यालयसं सायँ (तामाड) भाय्या ब्वनामिपुं अपलं ब्वँ वगु खानय् द: गुलिं लयता प्वंकसे वयकलं थानाया मेगु भायया शिक्षकपिसं नं थमनं तामाड (सायँ) भाय् सय्क: अमिगु भाषं ब्वंकसा अज बांलाइगु खॉ काड: दिल ।

नायोभाजु बिजुक्छँ जुं अंग्रेजं भारतय् उपनिवेश याता, भारतीय जनतां अंग्रेजतयता लिड: छवता अलय वहे अंग्रेजतयगु नीति अ:भारतीय शासक पिसं डाल: जलाखाला देशता क्वत्यलयगु स्वयो च्वंगु खॉ काड: दिसे अ: ब्वनामिपिन्के ब्वलाड: च्वंगु विदेश वानयगु मतिता शिक्षक पिसं हिडक: विय फ: । शिक्षक देशभक्त जुसा ब्वनामिपुं नं देशभक्त जुडुगु अलय् शिक्षक विदेशी दलाल जूसा ब्वनामिपुं नं अथेहे जुडुगुलिं शिक्षकपिसं ब्वनामिपिन्ता देशभक्ति भावना ब्वलांक: भ्नीगु देया सेवा यायगु बिच: बियम: धायो दिल ।

ज्या इव: सं खवप नगरपालिकाया उपमेयर रजनी

जोशी जुं खवप नगरपालिकां शिक्षा, स्वास्थ्य, सम्पदा ल्यंक: म्वाक: वगु खॉ कुल: दिसे मंसिर २८ गते निसं पुस २ गते तक जुडुगु खवप महोत्सव त:जिक हानयता सकल सिया साथ व ग्वाहालीया नितिं इनाप याड: दिल ।

विद्यालय व्यवस्थापन समितिया नायो नपां वडा नं ५ या वडाध्यक्ष योगेन्द्र मान बिजुक्छँ जुं सभाया नायोया भाला कुबियो दिसे ६५दा हाँ थानाया न्हयलुवापिसं थुगु ब्वनय्कुथिया जग तयो हज्याक: द्युगु मिहेनत सितिं मवां धायो दिल ।

कलेज व्यवस्थापन समितिया नायो उद्वव सुजखुं छुखा छँ छम्हा स्नातक दय्केगु तातुना खय् थुगु कलेजयाय्गु नं लाहा द:गु नपां ब्वनय कुथिं स्थानीय जनताया मन क्वसायक: ज्यासानय् फ:गुलि लयता प्वंक दिल ।

नेपाल क्रान्तिकारी शिक्षक संघया केन्द्रीय नायोभाजु जानसागर प्रजापति जुं संसदय् विचाराधिन शिक्षा विधेयकं शिक्षकपिनिगु सार्वभौम, राजनैतिक व मौलिक हक, वाक स्वतन्त्रता लुटय याड: काय् तांगुलि आपत्ति प्वंकसे शिक्षासं राज्यया लाय म्हवचा जुगुलिं अभिभावक पिनिगु कपालय आर्थिक भार लागु खॉ काड: दिल ।

सार्वजनिक मा.वि. संयुक्त परीक्षा समितिया नायो भाजु रोशनराज तुर्दुतुर्दु शिक्षक अभिभावकपिसं ब्वनामिपिनिगु भावना थुडक: ज्या याय् मफूसा दुर्घटना जुडुगुलिं सचेत जुयम: धायोदिल ।

ज्या इव: सं कलेजय दीर्घ सेवा याड: द्युम्हा प्रा. सिद्धिरत्न शाक्य जू याता मू पाहाँ बिजुक्छँ जुं दोसल्ला ड्युक हानयज्या याड: दिलसा हानय् ज्या याम्हा शाक्यजुं बिजुक्छँ जु थजाम्हा आदर्श राजनीतिक व्यक्तित्वपाखं थ:हांकय् द:गुलिं तस्कं भाग्यमानी जुगु नपां थ:गु शैक्षिक अनुभव काड: दिल ।

प्रधानाध्यापक श्रीकृष्ण किसी जुं ब्वनय्कुथि व कलेजया प्रगति प्रतिवेदन पिब्वयो द्युगु ख:सा सहायक प्र.अ. चक्र बहादुर चाकतुं लसकुस न्वचु व प्लस 'टु' इन्चार्ज राकेश सुकुपायो सुभाय् देछायो द्युगु नपां प्रेम जन थापा जुं नं न्वचु तयो द्युगु ख: ।

ज्या इव:सं हिदा कलेज व ब्वनय्कुथि ब्वंकय् धुकपुं शिक्षकपिन्ता हना पौ व डादा ब्वंकय् धुपिन्ता सुभायपौ ल: ल्हाड: द्युगु ख:सा अतिरिक्त क्रियाकलापय् त: लापिन्ता मेडल व दसिपौ ल: ल्हागु उगु ज्या इव:सं ज्या इव: लिपा सांस्कृतिक ज्या इव: नं क्यगु ख: ।

परीक्षा समिति निःस्वान

मंसिर ७ गते

ऐन २०७४ या परिच्छेद ६ या दफा १५ काथं खवप नगरपालिका



वडा नं. ५ या वडाध्यक्ष योगेन्द्रमान बिजुक्छेँ जुया नायोसुई च्याम्हासिया परीक्षा समिति निःस्वान ।

उगु समितिसं नायो योगेन्द्रमान बिजुक्छेँ, दुजःपुं वडाध्यक्षपुं रबिन्द्र ज्याखव (९), उकेश कवां (७), सार्वजनिक माध्यमिक विद्यालय, संयुक्त परीक्षा समितिया गणेशराम थुसा, सामुहिक परीक्षा समितिया राम हाडा, निजी तथा आवासीय विद्यालय अर्गनाइजेशन, नेपाल (प्याब्सन) या शिव कुमार कोजू, संस्थागत विद्यालय संघ नेपाल (इसान) या बदन केशरी प्रजापति व एन प्याब्सन या राम प्रसाद खाताखव दःगु खः ।

समिति निःस्वानय् धुंक नगर प्रमुख सुनिल प्रजापति जुं सकल पदाधिकारी जू पिन्ता पद व

नगर शिक्षा समितिं भक्तपुरं शुक्रवार खवप नगरपालिका दुनय्या ब्वनयकुथि ब्वडचवंपुं ब्वनामिपिनिगु परीक्षा न्ह्याकय्गु, समन्वय व मःगु ब्यवस्था याय्ता भक्तपुर नगरपालिका शिक्षा

गोपनियताया सपथ ग्रहण याकः द्युगु खः सा प्रमुख प्रजापति जुं नगरपालिकां न्ह्याकिगु परीक्षात स्वच्छ, मर्यादित नपां अनुशासित काथं न्ह्याकः क्वचाय्केता नं धायो दिल ।

वंश गोपालया फल्चा निःस्वान

मंसिर ३ गते

खवप नगरपालिकाया उप मेयर रजनी जोशी जुं खवप नगरपालिका वडा नं. ३ वडा समितिया ग्वसालय बंशगोपालया फल्चा ल्हवनय्ता निःस्वाडः दिसे खवप नगरपालिकां नगरवासी पिनिगु मति काथं सुभावा न्यडः जनताया ग्वाहालीं उपभोक्ता समिति दयकः ज्या साडः वयागु गुकिं म्हवचा लागतं भिंकः बल्लाकः थःगु धाय्गु भावना ब्वलांक वगु नपां खवप देता म्वाडः च्वंगु नगर काथं ह्छ्याय्ता थानाया कला-संस्कृति, सम्पदाता माया याडः म्वाकः तय फःसा भी थःजुयो म्हासिइका पिब्वयो जुय दैगु खाँ काडः दिल । नपां 'खवप महोत्सव' सकलसियागु जूगुलिं सकलसिनं साथ व ग्वाहाली याडः तःजिक हानय्ता इनाप याडः दिल ।

वडा नं ३ या वडाध्यक्ष राजकृष्ण गोरं वडाया ज्या इवःतःकाडः दिसे सम्पदा ल्हवनय कानय् ज्याखय् स्थानीय मनूतय्गु ग्वाहाली मदयक मगा धायोदिल ।

खवप नगरपालिकाया बजेटं दयकगु बंशगोपालया फल्चा दयकेगु उपभोक्तासमितिया नायो रामसुन्दर खाताखोया नायोसुई



जूगु निःस्वानय्गु ज्या इवः सं महिला वडाया दुजः सुनिता अवाल, उपभोक्ता अनुगमन समिति नपां वडाया दुजः कृष्ण गोपाल चौगुथि, उपभोक्ता समितिया दुजः सर्जु प्रसाद प्रधानाड्गु पिसं नं न्वचु तयो द्युगु खः ।

लक्ष्मी नरसिंह द्यो प्रतिस्थापन

मंसिर ४ गते

खप नगरपालिका वडा नं ४ ग:हिति लक्ष्मीनरसिंह देगलय २०८१ मंसिर २ गते लक्ष्मीनरसिंह द्योया मूर्ति प्रतिस्थापन यात ।



खपय् नेपालगञ्जया जनप्रतिनिधिपुं

मंसिर १५ गते

खप नगरपालिकाया प्रमुख सुनिल प्रजापति जु नपां नेपालगञ्ज उप महा-नगरपालिकाया न्यायिक समितिया पदाधिकारीपुं भायो नपालाड दिसे खप नगरपालिकां याड: च्वंगु न्यायिक समितिया ज्या त: सीइक थुइक: इजलास कक्ष नं भायो स्वयो दिल । उगु नपालाय्गु इवलय खप नगरपालिका वडा नं. ६ या वडाध्यक्ष हरिराम सुवाल, नेपालगञ्ज उपमहानगरपालिका वडा नं २० या वडाध्यक्ष कौशल कुमार धोबी, का.पा. दुज: मुजम्मीद हुसैन हल्वाइ, न्यायिक समितिया दुज: रुमिता श्रेष्ठ व कानून अधिकृत माया शर्मा पूं नं भःगु ख: ।



अन्तर्राष्ट्रिय कासामि दुवाल ता विदाइ

खप नगरपालिकाया प्रमुख सुनिल प्रजापतिजुं थाइल्याण्डया चियाड माईध:थाय् जुइगु इलाइट मिसा व मिजं तय्गु बक्सिड च्याम्पियनसिप ब्वति क:वानिपुं खप नगरपालिकाया बक्सिडया कासामि अस्मिता दुवालता देया इज्जत तय फय्का: म्हेत: वयता भिंतुना देछासं मंसिर १३ गते विदाइयाड: दिल ।

मिजं तय्गु ४८ के.जि. खय् लालप्रसाद उप्रेती व ५१ के.जि. खय् लक्ष्मण राई, मिसापुं कासामिखय् ४८ के.जि. खय् आरती बम्जन अलय ५१ के.जि. खय् अस्मिता दुवालं म्हितिगु ख: ।

खप महोत्सव प्रचारया नितिं थी थी ज्याइवः



कार्तिक ३० गते

खप नगरपालिकाया प्रमुख सुनिल प्रजापति जुं खप महोत्सव याय् मःगुया खाँ काडः दिसे थुकिं खपया कला, संस्कृति, सांस्कृतिक सम्पदा, भीथाय सयकगु थःगु हे उत्पादनत नपां भीगु म्वायगु पहः हलिमय ब्याक प्रचार याय्ता घ्वासा जुइगु खाँ काडः दिसे थ्व खाँ सकल थासय् ब्याकय्ता नगरब्यागु ब्वनय्कुथिया गुगुनिसैं हिंन्यगू तगिंतकया ब्वनामिपिनिगु दश्वी जुगू 'कला, संस्कृति व सम्पदा' विषयया च्वखँया धिंधिबल्ला न्ह्याकय् हाँ खप देता पर्यटकपूँ छक मवसैं मगागु थाय् काथं च्वजाय्कः पर्यटनपाखं नगर व नगरवासीपिनिगु आर्थिक विकास याय्ता ग्वाहाली याय्गु महोत्सवया तातुना खः धायोदिल ।



पर्यटन देया स्यल्लागु थां खः धायोदिसे वयकलं खपया दुथा (आन्तरिक स्रोत) बल्लाकय्ता खप नगरपालिकां देशं दुनयया पर्यटकपुं अपलं दुकाय्गुलि बःयाड वयागु खाँ ब्याकसे खप महोत्सवता सभ्य, (भव्य) तःजिक व स्यल्लाक हानय्ता थी थी कासात नपां थी थी ज्या इवःत ग्वसः ग्वयो वयागु खॉलिसैं खप

देता हलिमय्या च्वजःगु वास्तुकला दःगु थाय् खः धायोदिल ।
च्वखँ धिंधि बल्लासं नगरया च्यागू सामुदायिक व हिंडागु संस्थागत ब्वनय्कुथि याडः नीस्वंगू ब्वनय्कुथिया ६५ म्हा ब्वनामिपिसं ब्वति कःगु खः ।

खप देया म्हासिइका देश विदेशय् पिब्यता महोत्सव

मंसिर २ गते



खप नगरपालिकाया प्रमुख सुनिल प्रजापतिया मू पाहाँलय् खप महोत्सवया खाँ ब्याकय्गू तातुडः भनपा सभाकक्षसं कर्मचारी पुं मुंकेसे 'खप महोत्सव आयोजना याय् मःगुया मू तातुना खपया कला-संस्कृति व तजिलजिता देश विदेशय् म्हासिइके बियगु नपां खप देशय् देशं दुनय व देशं पिनय्या पर्यटकपिन्ता मनक्वसायकः ब्वनय्गु खः धायोदिसे वयकलं खप नगरब्याक डान्हु तक नखाथें भःभः धाय्कः तय्ता खप नगरपालिकाया कर्मचारीपूँ अनुशासित जुयो जिम्मेवारी कुबियो ज्या सानय्ता बः याडः दिसे महोत्सव ज्वःछि स्वः भ्नाइपुं पाहाँपिन्ता शान्तिसुरक्षा बांलाक बियमः धायोदिल ।

खप दे कला व संस्कृतिं जःगु थाय् जुगुलीं सम्पदा ल्यंकः, म्वाकः, भिकः तय्गु ज्या हृदायतयो विश्व सम्पदा नपांया सम्पदात ल्यंकः म्वाकः वयागु खाँ ब्याकसे वयकलं महोत्सव ज्वःछि सम्पदा लागा व अवलोकन लागाय् सुचुकुचु याड तयमः धायोदिल ।

मू पाहाँ प्रजापति जुं महोत्सवता सभ्य, भव्य याडः तः जिक हानय्ता नपां सदां लुमाडः वैगु काथं डाय्केता थः थः गु थासं ग्वाहाली याडः महोत्सवता हृदाय तयो ज्या सानय्ता बः याडः दिल ।

सच्छिखत पीखुगूगु खवप पौ. ब.खि पौ(पाक्षिक)

उपप्रमुख रजनी जोशी 'खवप महोत्सव' भीता लाडः स्वैगु छगू परीक्षा खः, उकी थुकिता तःजिक हानयता थःथःगु थासं ग्वाहाली याय्मःगु खाँ नपां थुगु इलय कर्मचारीपुं मेबलय स्वयो अपः ज्या सानय मः धायोदिल ।

भक्तपुर महोत्सव सचिवालयया संयोजक गौतमप्रसाद लासिवं थुगु महोत्सवया लागिं अःतक जुयो च्वंगु ज्याया बचा हाकलं प्रस्तुति पिबवसे खवप महोत्सव तयारीसं १६१ म्हा दुजः दःगु मूल समारोह समिति, २५म्हा दुज दःगु निर्देशक समिति व १३ गू थी थी समितित निःस्वानय धुंगु गुकिया मदिकक बैठक च्वडः ज्या न्हायकः च्वंगु दः धायो दिल ।

नपां प्रशासकीय अधिकृत दामोदर सुवालं खवप महोत्सव डाय्केता कर्मचारी पिनिगु भूमिकाया खाँ काडः दिल ।

न्हयसः लिसः कासा

मंसिर ८ गते



खवप महोत्सव प्रचारार्थ खवप नगर व्यागु न्हयसः लिसः कासा (आधारभूत तगिं) २०८१ मंसिर ४ गते जुल ।

खवप महोत्सव लुमांकय बह जुइक हानयगु कुतः याय्



खवप नगरपालिकाया ग्वसालय् मंसिर २८ गते निसें पुस २ गते तक डाय्किगु खवप महोत्सव तः जिक हानयता थौं कृषकपुं मुंकः खवप नगरपालिकाया प्रमुख सुनिल प्रजापति जुं कृषि (बु सैगु) उत्पादनया व्यवसायिक ब्वज्या खवप नगरपालिका वडा नं. ५ पसिखेलय् (तरकारी बजार) जुइगु खाँ ब्याकसे खवप महोत्सव जनताया महोत्सव जूगुलिं थुकिता हार्यपुकः तःजिक हानयता सकलसिया ग्वाहाली मदिकक मगा धायोदिल ।

खवपया किसानतय्सं सयकगु बुँया उत्पादनत ब्वयगु छगू मौका नं जुगुलिं महोत्सवया इलय फुकक लागता दुथ्याकयगु कुतः जुयो च्वंगु खाँ व्याकसे वयकलं थुकिं कृषकतय मन च्वजाइगु खाँ नपां कृषि व पर्यटन देशया अर्थतन्त्र च्वजायकेगु लिधंसा खः धायो दिल ।

वयकलं महोत्सवय सहकारी, कासा, सांस्कृतिक ज्या इवः व मेमेगु हस्तकला ब्वज्या, शैक्षिक ब्वज्या नपां व्यापार मेला याडः खवप दे जाय्कः हार्यपुक तयता, तः जिक हानयता सकलसिनं ग्वाहाली यायता इनाप याडः दिसे महोत्सव लुमांकय बह याडः डाय्केगु कुतः जुयो च्वंगु खाँ काडः दिल ।

मुंज्या सं वडा नं. ३ या वडाध्यक्ष राजकृष्ण गोरं महोत्सवय स्वय हार्यपुक ब्वइगु थी थी हलंज्वलं नपां किसानतय्गु जीवन शैली स्वय दै धायो दिल । नपां कृषि समितिया दुजः लक्ष्मी प्रसाद हयोंमिखां नं न्वचु तयो द्यगु खः ।

भक्तपुर महोत्सवया प्रचारार्थ भिन्तुना न्याली

मंसिर ५ गते



मंसिर २८ गते निसें पौष २ गते तक जुइगु भक्तपुर महोत्सवया प्रचारार्थ मंसिर ५ गते खवप नगरपालिका वडा नं १ या ग्वसालय जुगु भिन्तुना न्याली सं खवप नगरपालिकाया प्रमुख सुनिल प्रजापति जुं ।

पर्यटन व्यवसायीपुं मुंकल



खवप महोत्सव तःजिक हानयता बुधवार पर्यटन व्यवसायीपुं मुंकः खवप नगर प्रमुख सुनिल प्रजापति जुं देया आर्थिक अवस्था चवजायकेता पर्यटन व्यवसायी पिनिगु तःहांगु लाहा दैगुलिं महोत्सव २०८१ तःजिक हानयता पर्यटन व्यवसायी पिनिगु ग्वाहाली मद्यक मगा धायो दिसे पर्यटक छक मवसें मगागु गन्तव्य स्थल व सांस्कृतिक नगरी काथं म्हासिइका पिबवयो वयो च्वंगु खवप दे या कला संस्कृति व सम्पदात ल्यंकः म्वाकः भिंकः यंक देशं व विदेश्य पर्यटक पिनी दश्वी ब्वज्या याय्गु मौका काथं खवप महोत्सवया ग्वसः ग्वयागु खाँ काडः दिल ।

विदेशी पर्यटकपुं नेपः या परिवेश्य लयताइगु नपां थानाया भीगु थःगु मौलिक सांस्कृतिक स्वयता नेपालय चाह्यु वैगु खाँ काडः दिसे वयकलं भीगु थःगु पहः भीगु मौलिकता हे भीगु म्हासिइका खः धायोदिल ।

अथेहे वडा नं ९ या वडाध्यक्ष रबिन्द्र ज्याख्व जुं महोत्सव जूतलय खवप दे ब्याक नखा थें भः भः धायक तय्गु तातुडः खवप नगरपालिकां मः काथं ज्या याडः च्वंगु खाँ ब्याकसे खवप महोत्सव तः जिक व लुमन्ति दैगु काथं डायकेगु कुतः याडः च्वडागु खाँ नं काडः दिल ।

भक्तपुर महोत्सव २०८१ सचिवालयया कजि गौतम प्रसाद लासिवं महोत्सवया स्वय लाइकगु ज्या इवः त काडः दिसे डान्ह्या महोत्सवय पर्यटन व्यवसायीपुं मन क्वसायक हज्याडः दीगु आशा प्वंक दिल ।

अथेहे खवप नगरपालिका वडा नं २ या वडाया दुजः, मञ्जुमैयाँ लाखा व भक्तपुर पर्यटन व विकास समितिया नायो राम सुन्दर भेले जुपिसं नं न्वचु तयो द्युगु खः ।

अथेहे वडा नं. २ सं महोत्सव २०८१ तःजिक हानयता नगर प्रमुख सुनिल प्रजापतिया मुपाहाँलय जूगु मुंज्यासं न्वचु तयो दिसे प्रमुख प्रजापति जुं खवप देता छक पर्यटकपुं मवसें मगागु

सच्छिव पीखुगु खवप पौ. ब.छि पौ(पाक्षिक)

पर्यटकीय गन्तव्य स्थल दयकेगुं खवप नगरपालिकाया आजु पूवांकयता खवप महोत्सवं बांलाकिगु खाँ काडः दिसे देश विदेशया पर्यटक पिसं खवपया कला, संस्कृति, म्वायगु पहः, पेशा ब्यवसाय, नसा त्वँसा, तिसावस ज्वलं, थी थी वस्तुत थःगु मिखालं हे स्वय दैगु लिं थानाया मूर्त व अमूर्त सम्पदां खवप देता म्वाडः च्वंगु संग्रहालय दयकगु खाँ काडः दिल ।

देशं दुनयया पर्यटन हज्याकय फः सा नगरता स्यल्लाक हज्याकयता ग्वाहाली जुइगुलिं वयकलं लिपाथ्यंक तातुडगु पर्यटन विकासया अवधारणा छ्यलः वयागु खाँ ब्याकसे खवप नगरपालिकां देश्य हे डालय बहगु ज्या याडः वगु नपां थुगु नगरपालिकाता थःगु तुतिखय दानय फैगु काथं हज्याडः यंकय्गु तातुड ज्या याडः वयागु खाँ काडः दिल ।

खवप नगरपालिका वडा नं २ या वडाध्यक्ष हरिप्रसाद बासुकलां महोत्सवया ग्वसलं ताडः वांगु व तानयतांगु कला संस्कृतित हकनं म्वाकःहय फैगुलिं थुकीं खवपया पर्यटन चवजायकेता ग्वाहाली जुइगु खाँ काडः दिल ।

ज्या इवः सं खवप महोत्सव सचिवालयया कजि गौतम प्रसाद लासिव जुं महोत्सवया बांलागु विस्कं पहः स्वय बहगु ज्या इवः त व थानाया खाँ काडः दिल । वडा नं. २ या वडाया दुजः मञ्जु मैया लाखां नं न्वचु तयो द्युगु खः ।

कासामिपुं मुंकल

मंसिर ७ गते



खवप महोत्सव तःजिक हानयगु इवलय खवप नगरपालिकाया ग्वसालय नगरपालिकाया सभाहलय कासामिपुं मुंकल ।

उगु मुंज्या खवप नगरपालिकाया उपप्रमुख नपां भक्तपुर महोत्सव अतिथि सत्कार समितिया कजि रजनी जोशीं पुर्खा दयकः तकगु कला व संस्कृति परम्परा अलय सम्पदा ल्यंकः म्वाकः तयता थाकुगु खाँ कुल दिसे महोत्सवं उकिता अःपुकः बिइगुलिं सकलसिनं लाहापा स्वाडः ग्वाहाली यायता इनाप याडः दिल ।

खवप नगरपालिकां शिक्षा, स्वास्थ्य, पर्यटन, कला,

सच्छिखत पीखुगुगु खवप पौ, बःखि पौ(पाक्षिक)

संस्कृति व सम्पदा ल्यंकः म्वाकः तय्ता याडः वयागु थी थी ज्या इवः खं याडः खवप देता नेवः संस्कृति ल्यंकः म्वाकः तःगु थाय् काथं काडगु खाँ काडः दिल ।

वयकलं आधुनिकताया नामय समाजय विकृति डाडः वयो च्वंगुलिं उकिता म्हवचा यायां यंकयता नपां थुगु महोत्सवं स्थानीय उत्पादन व भिगु थःगु पहः व ज्यायाता घ्वासा जुडगु खाँ ब्याकः दिल ।

वयकलं महोत्सवय् थी थी स्वय लाइकगु ब्वज्यात मध्ये शैक्षिक ब्वज्या, साफू ब्वज्या व बालमैत्री ज्या इवः खवप विश्व विद्यालय चाय्केता जुयो च्वंगु कुतः पिब्वय दैगु खाँ व्याकसे खवपया म्हासिडका पिब्वयता महोत्सवं बांलागु ज्या याड्धायो दिल । नपां वयकलं खवप महोत्सव स्वः भाडपुं पाहाँपिन्ता नगरबासीया नातां बांलागु व्यवहार व सत्कार याय् फःसा महोत्सव न्ह्याब्लें लुमांसे वड्गुलिं थुगु भाला भीसं कुबियमः धायोदिल ।

वडा नं ४ या वडाध्यक्ष उपेन्द्र सुवालं जनप्रतिनिधिपुं व जनतात ला व लुसी थें जुड्गुलिं महोत्सव कासामिपिसं ब्वड्गु कासा व धिं धिं बल्ला खं महोत्सव अभ् बांलाड्गु खाँ ब्याकसे खवप नगरपालिकां कासा हज्याकय्गु ज्या महोत्सवय् स्वय दैगु काथं कासामिपिसं कुतः याय् मःगु नपां न्हिया न्हिथं अभ्यास यासा उसायँ बांलाड्गु खाँ काडः दिल ।

वडा नं. १ या वडाध्यक्ष श्याम कृष्ण खत्री जुं ज्या इवः खय् भःपुं सकलसिया लसकुस यासे महोत्सवय् कासामिपिसं मः थाय् ग्वाहाली जुयो ज्या याड्गु विश्वास प्वंकः दिल ।

भक्तपुर महोत्सव सचिवालयया कजि गौतम प्रसाद लासिवं महोत्सवता जुयो च्वंगु ज्यात काडः दिल सा युवा तथा खेलकुद समितिया दुजः राम सुन्दर बासीं नं न्वचु तयो द्यगु खः ।

सम्पदा बांलाक तय फःगु खवपया निंति गौरव
मंसिर ९ गते



खवप नगरपालिकाया प्रमुख सुनिल प्रजापति जुं खवप महोत्सव तःजिक हानय्गु सकलसिया मंकः कर्तव्य खः । वयकलं खवप महोत्सवया प्रचारार्थ ग्वसः ग्वगु संस्कृति कःमिपुं मुंकय्गु इवलय उगु खाँ धायोदिसे खवप नगरपालिकाता थःगु तुतिखय् दानय् फयकेगु काथं ज्या साडः वयागु नपां थानाया 'उपभोक्ता मोडेल' बिस्कं पहः पिब्वयो वयो च्वंगु खाँ नं क्वं छिडः दिल ।

खवप नगरपालिकां थानाया जनताया आर्थिक ग्वाहाली व श्रमदानं थानाया सच्छिमयाकं सम्पदात ल्हवनय-कानय् व दानय् धुगु विदेशी तय्के ध्याच्छ धेबा हे मकः सिं सम्पदा ल्हवनय कानय व दानय्गु ज्या क्वचाय्कागु खवपया निंतिं गर्वया खाँ खः धायोदिसे वयकलं नगरपालिकां लाहातय् ज्या दःपुं गुब्लें हे द्यां मलाईगुलि अजगु तालिम त बियो वयो च्वडागु खाँ ब्याक दिल ।

दायँ लाखौं देशं दुनय व देशं पिनय्या पर्यटकपुं थानाया ल्यंकः म्वाकः भिंकः तयो तःगु सम्पदात स्वयता खवपय् चाह्य् वैगु खाँ ब्याकसे वयकलं थानाया भीगु मौलिक पहः हे भीगु म्हासिडका खः धायो दिल ।

ज्या इवः सं वडा नं. ९ या वडाध्यक्ष रबिन्द्र ज्याख्व, प्रमुख प्रशासकीय अधिकृत वसन्त भट्टराई जूपिसं नं न्वचु तयो द्यगु खःसा खवप महोत्सव २०८१ सचिवालयया कजि भाजु गौतम प्रसाद लासिव जुं महोत्सवय् स्वय लाइक जुड्गु विषयया खाँ कुलदिल ।

त्वनामिपिनिगु शैक्षिक जग बल्लाकयता मिगु शिक्षा बियमः

मंसिर १० गते



मंसिर २८ गते निसें पुस २ गते तक जुड्गु भक्तपुर महोत्सवया प्रचार याय्गु काथं खवप नगरपालिकाया ग्वसालय् जूगु किपा या, च्वज्या, च्वखँ च्वज्या व न्ह्यसः लिसः कासाया धिंधिं बल्लाय् तः लापिन्ता सिरपा लः ल्हाय्गु ज्या नेपाल मजदुर

सच्छिखत पीखुगूगु खवप पौ, बःखि पौ(पाक्षिक)

खवप महोत्सव तः लाकयता उद्यमी

व्यवसायी व संघ संस्थात मुंकल

मंसिर ११ गते

किसान पार्टीया छ्याञ्जे नपां संघीय सांसद प्रेम सुवाल, खवप नगर प्रमुख सुनिल प्रजापति, वडाध्यक्ष योगेन्द्रमान बिजुक्छेँ (५) पाखं सोमबार छगू ज्या इवः सं सिरपा व दसिपौ लः ल्हाय्गु ज्या जुल ।

ज्या इवःया मू पाहाँ सांसद सुवाल जुं शैक्षिक गुणस्तर ल्यंक तयुगु ज्याखय् खवप नगरपालिकां संवेदनशील जुयो ज्या याडः वयो च्वंगु नपां परीक्षासं खुयो च्वकय् मबियगु ज्या नपां शिक्षकपिसं पाठ्य पुस्तक बाहेक सन्दर्भ सामग्रीत नं ब्वनयता ब्वकयता ध्वासा बियमः धायो दिल ।

वयकलं ब्वनयकुथिं थी थी भाय् अध्ययन अध्यापन याडः, कासा, सङ्गीत, कृषि च्वज्या, बांलाक आखः च्वयगु (हस्तलेखन) थजगु ज्यात स्यँ स्यं यंकय् मःगु ब्वनामिपिनिगु शैक्षिक जग बल्लाकयता ब्वनयकुथिं भिंगु, स्यल्लागु शिक्षा बियमः धायो दिल ।

वयकलं ब्वनामिपिन्ता मस्तबलय् निसँ सम्पदाया महत्व काँ काँ खवपया शिक्षा स्वास्थ्य, सम्पदा, ल्यंकः म्वाकः तयमःगु सुंचुकुचु व थानाया विशेषता (बिस्कं पहः) या खाँ काँ काँ ग्वाकः यंकयगुलि शिक्षकपिनिगु तः हांगु लाहा दै धायो दिल ।

ब्वनयकुथिं ब्वनामिपिनिगु व्यक्तित्व विकास यायता अतिरिक्त क्रियाकलापय् ध्यान तयमःगु खाँ व्याकसे वयकलं शैक्षिक संस्थातयसं योग्यताकाथं ज्या याय् फैगु काथंया शिक्षा बियमः धायोदिल ।

खवप नगरपालिकाया प्रमुख सुनिल प्रजापति जुं महोत्सव ज्वः छि खवपया फुक्क संघ, संस्था व समुदायतयता ज्या छ्यलयता महोत्सवया प्रचार याय्गु इवलय् यक्व यक्व थी थी पुचःत नपां खँलाहला याडः च्वडागु खाँ व्याकसे खवप महोत्सव खवपया कला, संस्कृति, सांस्कृतिक सम्पदा, नखाचखा, तजिलजि, नसात्वसा, भीगु हे थःगु कासात थी थी बिषयया खाँ ज्यात देश विदेशय् थ्यंकय्गु व क्यनयगु बांलागु ई काथं छ्यलय् दैगुलिं थुगु महोत्सव तः जिक् हानयता सकलसिया ग्वाहाली द्यमः धायोदिल ।

खवप नगरपालिका वडा नं ५ या वडाध्यक्ष योगेन्द्रमान बिजुक्छेँ जुं खवप महोत्सवया शैक्षिक मेलासं स्वयं लाइक जुइगु खाँत ब्वयो दिसे सकलसिया ग्वाहाली व सकलें स्वः भःसा महोत्सव तः लाइगु खाँ काडः दिल ।

ज्या इवःसं वडा नं. ९ या वडाध्यक्ष रबिन्द्र ज्याख्व व नगर शिक्षा अधिकृत साधुराम फुयाँल जुं नं न्वचु तयो द्यगु खः ।

‘भक्तपुरको कला, संस्कृति व सम्पदा विषयया कृषि च्वज्या, च्यागु तगिं तकया, गुगु निसँ हिन्त्यगू तगिं तकया च्वखँया धिंधिं बल्ला, खुगू निसँ च्यागू तगिं तकया न्ह्यसः लिसः कासा या धिं धिं बल्लासं तःलापिन्ता सिरपा व दसिपौ लः ल्हागु खः ।



‘भी सुयाय्गुं भरय् च्वनय् मज्यू थःगु हे मेहनतं मः काथं हज्याडः वानय् फय्मः’ उगु खाँ खवप नगरपालिकाया प्रमुख नपां खवप महोत्सव मूल समितिया कजि सुनिल प्रजापति जुं तयारीया इवलय मुंकःपुं उद्यमी, व्यवसायी व संघ संस्थाया प्रतिनिधिपिनिगु मुंज्या सं मंगलवार न्वचु तयो द्यगु खः ।

वयकलं नेपः धाय्वं खवपया ख्वः हनय् दैगु काथंया खवप महोत्सव उकिया जग जुइगु काथं पिब्वय फैगुलिं महोत्सव तःजिकः, स्यल्लाकः हानयता सकल खवपया जनतां मन हवय्क, लसतां जायकः ब्वति कायता इनाप याड दिसे खवप नगरपालिकां थी थी लाहातय ज्या दैगु तालिमत बियो नगरबासी पिनि छुं भाति जुसाँ आमदानी दैःगु खाँ व्याकसे महोत्सबं थप आमदानी यायता ग्वाहाली जुइगु खाँ काडः दिल ।

वयकलं उच्चशिक्षा ब्वनयता चीनय् वाडः च्वंपुं ब्वनामिपिसं खवपया थःगु हे मौलिक सीप, संस्कृति व हस्तकलाया खायँ चिनियाँ बजारय् खाँ काँ काँ प्रचार प्रसार याडः च्वंगु खाँ कुल दिसे सरकारय् वापुं शासक दलतयसं भीगु थःगु मौलिक उत्पादनता च्वछासे, प्रचार-प्रसार याय् मफुगुलिं समस्या पिज्वःगु खाँ काडः दिल ।

वयकलं स्वनिगलय् खवपय् अपलं पर्यटकपुं वइगु ल्या दःगु खाँ काडः दिसे खवप नगरपालिकां थानाया कला,संस्कृति व सम्पदात ल्यंकः म्वाकः तयगु याडः च्वंगु ज्याखं देशं पिनय्या पर्यटकपुं मन क्वसायक द्रहँ वयो च्वंगु खाँ नं काडः दिल । नपां वयकलं चिच्याहांगु उद्योग व व्यवसायीपिन्ता थाकाय्कगु मतिं महोत्सव ग्वसः ग्वयागु खाँ व्याकसे हस्तकलाया महत्व कानयता सकल उद्योगीपिन्ता अजः बांलाक हज्यायता इनाप याडः दिल ।

ज्या इवः सं वडा नं ७ या वडाध्यक्ष उकेश कवां जुं ख्वप महोत्सव ख्वपया जनतत व उद्योगीपिन्ता आर्थिक विकास नपां थानाया आर्थिक, सांस्कृतिकस्तर च्वजाय्केता ग्वसः ग्वगुलिं सकल सिनं ग्वाहालीयाय्मः धायोदिल । नपां वडा नं ३ या वडाध्यक्ष राजकृष्ण गोरं महोत्सवं भीगु थःगु उत्पादनता ब्यवसायीकरण याकय्ता ग्वसः ग्वगु खाँ ब्याकसे महोत्सव स्वः भ्नाइपिन्ता मन ह्वय्क, थः भः पियो लसकुस याय् फःसा सदाया लुमन्ति दैगु खाँ ब्याकः दिल । अथेहे वडा नं.२ या वडाध्यक्ष हरिप्रसाद बासुकलां महोत्सवय् नेवः संस्कृति व तजिलजि नपां म्वाय्गु पहः पिब्वइगुलिं अजनं हिंसी दैगु थुकिं देशं दुनय् व देशं पिनय्या पर्यटकपुं अपलं द्रहँ वैगु खाँ काडः दिल ।

ज्या इवः सं ख्वप महोत्सव सचिवालय समितिया कजि गौतम प्रसाद लासिवं महोत्सवया तयारीया खाँ अलय सचिवालयया दुजः विकास प्रजापतिं नं न्वचु तयो द्यूगु खः ।

सम्पदा ल्यंकः म्वाकः तयता ख्वप नगरपालिका हज्याडः हे च्वनि



ख्वप नगरपालिकाया सफाईकःमि पिन्ता मुंकः ख्वप महोत्सव २०८१ या खाँ ब्याकय्ता यागु भेलासं उपप्रमुख रजनी जोशी जुं स्वनिगः पिनय्या महानुभाव पुं यें वै बलय् ख्वपय् छक दुमस्वसें मवानिगु जुयो वय धुंगु खाँ ब्याकसे भीगु कला संस्कृति, संस्कार व कलाकारिताया लागा न्हापा व अः छु पाता अलय् कन्ह्यें गय् जुइ धाय्गु क्यनय्गु ई ख्वप महोत्सव खः धायो दिसे यचु पिचुगु शान्तगु ख्वप दे धाय्गु मनय् वांकय्ता सम्पदात ल्यंकः म्वाकः तयग्गु ज्या ख्वप नगरपालिकां याडः वयो च्वंगु खाँ ब्याक दिल ।

वयकलं यचुपिचुक तयता सफाईकःमि पिनिगु अपलं मेहनत दःगु खाँ ब्याकसे ख्वप महोत्सवय नं अज बांलाक मेहनत

सच्छिव पीखुगु ख्वप पौ. बःछि पौ(पाक्षिक)

याइगु विश्वास कासे संस्कृति धाय्गु बोली बचन, सभ्य व्यवहार, पाहों सत्कार, हानय्मः मानय्मः दय्कः न्हिलाख्वलं सद्भाव याड, नयगु त्वनय्गु तजिलजि नपां लाइगुलिं भिंपुं नागरिक काथं पिब्वयो सुसंस्कृत जुयता इनाप याडः दिल ।

वडा नं ९ या वडाध्यक्ष रबिन्द्र ज्याख्व (वातावरण समितिया कजि) जुं सुचुकुचु सभ्यताया म्हासिइका खः, उसायें बांलापिसं बांलाक ज्या सानय् फौगुलिं थौ सुचुकुचु कःमि पिन्ता म्हेग स्वयो बांलाक स्वयो वगु खाँ ब्याकसे सुचुकुचु ज्या सुसंस्कृत, हांकः अलय् मर्यादित काथं स्वइगु पेशा खः धायो दिसे विश्व सम्पदाया धलः खय् दुथ्यागु ख्वप दे विश्व याय् हे सम्पति खः धायो दिल ।

सचिवालयया कजि गौतम प्रसाद लासिव जुं ज्याखं जस नं अपजस नं वय फःगुलिं जसवयकः ज्या सानय् मः धायो दिल । नपां श्यानितेशन उपशाखाया प्रमुख दिलिप कुमार सुवाल जुं लसकुस व निरीक्षक रामकृष्ण प्रजापतिं मुंकागुया तातुना काडः दिल ।

६ वडाय नं महोत्सवया निंति मुंज्या



हःनय वयो च्वंगु ख्वप महोत्सवया प्रचारार्थ नगरपालिका वडा नं. ६ सं मुंकगु भोलासं ख्वप नगरपालिकाया प्रमुख सुनिल प्रजापति जुं ख्वपया सीप व उत्पादन हलिमय ब्याक ब्वयगु, ताड वानय् तांक संस्कृति ल्यंकः म्वाकः तयग्गु, नपां सार्वजनिक सम्पति ल्यंकः म्वाकः तयागु खाँ मंसिर १३ गते ब्याकसे थुगु महोत्सव व्यापारया लागिं जक मखुसें (ख्वपया म्हासिइका पिब्वयो देश विदेशया पर्यटकपुं दुकाय्ता खः धायोदिल ।

वडाध्यक्ष हरिराम सुवालं थव थःगु हे ज्या इवः जूगुलिं थुकिता स्यल्लाक तजिक हानय्ता सकल पुचः संस्थात सक्रिय जुयता इनाप याडः दिल ।

अथेहे समाजसेवी गोपीकृष्ण चांगुभारी फुक्कथाय सुचुकुचु याडः फुक्क थासय् भिंकः तय्मः धायो दिलसा महोत्सव सचिवालयया कजि गौतम प्रसाद लासिव महोत्सवया खाँ काडः दिलसा वडाया दुजः गोविन्द दुवालं लसकुस व का.पा या दुजः रोशन मैयौ सुवालं नं न्वचु तयो द्यूगु खः ।

खप महोत्सव तः जिक हान्य

१. सांस्कृतिक कार्यक्रम - लायक, क्वाठण्डौ, दत्तात्रय, टौमढी व नगरया थी थी थासय प्रगतिशील भजन
२. नगरा वादन - लायक
३. पौभा व तस्बीर प्रदर्शनी - तब सतः, पचपन्न भ्याल चोक (लायक) व वाँचु त्वः
४. चित्रकला, छ्वालीकला व तस्बीर प्रदर्शनी - लायक, थथुबहि व कुथुबहि (मिनिबस पार्क)
५. परम्परागत पोशाक प्रदर्शनी - लायक, टौमढी, दत्तात्रय व तःपुखू (सिद्धपोखरी)
६. खाना महोत्सव - यातुबारे पुखू (कमलविनायक), नाग पुखू, खर्ला, जेर्ला, खौमा व भाज्या पुखू
७. हलिमलि - छुमागणेश (चोर्छे), वाकूपति नारायण, दत्तात्रय, गोल्मढी, यार्छे व टौमढी
८. परम्परागत वाद्यवादन सामग्री प्रदर्शनी - मुलार्छे व वाकूपति नारायण
९. परम्परागत का छियगु - थालार्छे (नागपुखू), गोल्मढी व तुलार्छे
१०. कुमारी (जीवित देवी) प्रदर्शनी - प्रशन्नशील महाविहार, क्वाठण्डौ
११. दिपंकर बुद्ध प्रदर्शनी - प्रशन्नशील महाविहार, भौरबहि, चतुर्ब्रम्ह महाविहार, थथुबहि व कुथुबहि
१२. नवदुर्गा प्रदर्शनी - नवदुर्गा द्यःछे, (गर्छे)
१३. शैक्षिक प्रदर्शनी - स्वप कलेज (देकोचा) व स्वप इन्जिनियरिङ कलेज (लिवाली)
१४. नौका विहार - यातुबारे पुखू (कमलविनायक), तःपुखू, न्हःपुखू व भाज्या पुखू, नःपुखुलिङ साइक्लिङ
१५. मृत्तिका कलाया परम्परागत व न्हूंगु उत्पादनया जीवन्त प्रदर्शनी - सूर्यमढी व तालाक्व

१६. परम्परागत खेलकूद प्रदर्शनी व प्रतियोगिता - ब्यासी, भोलार्छे, लाकुलार्छे, तल्लातुंघी (वातिकुधि)
१७. नेवार जीवन शैलीया गतिविधि प्रदर्शनी - ब्यासी, ब्रम्हायणी द्यःछे, गर्छे, जेर्ला, नाग पुखू, गलसी पुखू, चोर्छे, देगमना, दुमलाचा व तपालाघी
१८. नौ बाजा प्रदर्शनी - सूर्यमढी (वाकूपती नारायण), सःकोलान/दत्तात्रय, यार्छे, टौमढी व बंशगोपाल
१९. धौ महोत्सव - यार्छे, लालार्छे, जेर्ला व स्वंगःलोर्हे (चोर्चा)
२०. दीपावली - यातुबारे पुखू (कमलविनायक), तःपुखू व नगर दुनयथा पुखुत
२१. बौद्ध प्रकाशन व तस्बीर प्रदर्शनी - भौरबहि (गोल्मढी)
२२. सहकारीतयगु गतिविधि प्रदर्शनी - याता (गोल्मढी)
२३. बालबालिका मैत्री गतिविधि/सांस्कृतिक कार्यक्रम - शहीद स्मृति उद्यान व ल्योसिं ख्यः(खःर्ला)
२४. कृषि उत्पादनया व्यावसायिक प्रदर्शनी - पसिखेल (तरकारी बजार)
२५. घरेलु उत्पादन व हस्तकलाया जीवन्त प्रदर्शनी - नासमना, तेखापुखू व नःपुखू
२६. व्यापार मेला - ब्यासी (भनपा भवन हन्य) व महेश्वरी खेल मैदान (पाँचाख्यः)
२७. पुस्तक प्रदर्शनी - लॉम्हुगः (कमलविनायक)
२८. बुद्ध अस्तु नपां बौद्ध दर्शन सम्बन्धी प्रदर्शनी - मुनिविहार (खँचा)
२९. थी थी कासा गतिविधि नपां प्रदर्शनी - शहीद स्मृति खेल मैदान
३०. परम्परागत तुःचिकं काकयगु प्रदर्शनी - सःकोलान व ईचाडोल
३१. सांस्कृतिक जात्रा/पर्व संस्कृतिया नमुना प्रदर्शनी - गःहिति
३२. परम्परागत वाद्यवादन प्रतियोगिता नपां प्रदर्शनी - प्रदक्षिणा मार्ग



मोबाईल एप



भक्तपुर नगरपालिका

भक्तपुर महोत्सव सचिवालय

ब्यासी २, भक्तपुर, ०१-६६११६०५

ईमेल : mail@infobhaktapur.com

www.infobhaktapur.com

ख्वप नगर ढुनय्या ब्वनय्कुथिया परीक्षा समिति निःस्वान

(२०८१ मंसिर ७ गते)



ख्वप महोत्सवय् छ्यलिगु पुखुया निरीक्षण

(२०८१ मंसिर १२ गते)





प्रवासं भ्रुःपुं चिनियाँ महाभंघया प्रतिनिधि पुचः ब्खपय
(२०८१ कार्तिक २९ गते)



ब्खप महोत्सवया प्रचारार्थ १ नं. षडाभं भिंतुना च्याली
(२०८१ मंसिर ५ गते)